

Je'ej ti ye'ej tyo'yú'xaca' a'íjna i San Pablo a'íjma jimi i maj Roma jo'cháatima'caa

Pablo pu hua'tyojtye'

1 ¹Nyáaj nu Pablo yajá'muatyojtye', i nyaj jahuiire' i Ciríistu' ti Jesús pué'een, a'íi pu na'antyíhuoj, nyej nyij a'yan huárinyij je'ej ti a'íin tyinaata'íj, ajta na'vá'jaj nyej nyij huo'té'xaatyee'en i nyúucaria'ra' i Dios.

²Jájcuaaj imuáj pu i Dios a'yan tya'tóoratiiri' ti tyámua' tyihuo'tá'an, a'íj mu jin a'yan tyo'tyéyu'xaca' a'íjci jitze i yu'xarij ti'íj ityájma jimi huatyá'ítzeere'en. ³A'íjna i nyúucarij, a'íj pu á'xaj i Ciríistu' ti jí'yojra' ajta tavástara' pué'een, ti ajta a'yan tyu'nié'huaca' ti'íj tyévij, a'íj ti jitze eeráma'can i David. ⁴Ajta ti'íj huatájuuriaca', Dios pu a'yan jaatamua'aj tijin nyiyóoj pu pué'een, ajta jaatá' ti'íj néijmi'i jin antyúumua'reeriaj, ji'nye a'íj pu jitze aróoca'nyajca'aj i júuricama'ra' i Dios.

⁵Ciríistu' jimi nu ja'ancuriáa' a'íjci ti jin i Dios tyámua' tyinaatá', nyej nyij jitzán ma'can jó'me'en hua' tzajta' i tyeíttyee, mata'aj mij néijmi'que' i cháanacaj japua ja'antzaahuatyee'en majta a'íj ará'astej. ⁶Mati'íj mana'aj a'íimaj, mua'aj xu siajta hua' jitze ajtyáma'can mu siaj Roma ja'chej. Dios pu jéehua já'muaxie've', ajta jamua'antyíhuoo siaj sij jitzán ajtyama'cáantaj xá'ra'nyij i Jesús ti ajta Ciríistu' pué'een ajta siaj sij hua'ajtyáanaxca a'íjma i maj tyá'tzaahuatyee'. ⁷Che' i Dios, ajta i tavástara' a'íjna i Jesús ti ajta Ciríistu' pué'een, miche' a'íin tyámua' tyajamuaatá'an majta tyámua' jamuáa'uurej.

Pablo pu jaxie've' ti huojo'vá'muaarej a Roma

⁸Anaquéecan jime', a'íj nu jitze ma'can i Ciríistu' tyámua' tya'tá'caa i Dios ja'mua jime', ji'nye néijmi'que' i cháanacaj japua mu meríj jamua'reej siaj tyá'tzaahuatyee'. ⁹A'íjna i Dios, i nyaj jahuiire' néijmi'i jime' i nyaxiéjnyu'caa nyahua'ixáatya'aj i nyúucaria'ra' i yó'jra', a'íi pu jamua'reej nyaj a'náj tina'aj jamua'tamuá're'rii, ¹⁰a'yaa



© 1996 David C. Cook

Romanos 1:1-7

nu a'náj tina'aj tyá'huavij i Dios, tipua'aj a'yan tyinyatá'care'en juxié'vi'ra' jime' ney nyij jamojo'vá'muaarej. ¹¹ Ji'nye jéehua nu já'muasejramu' nyata'aj nyij ca'nyíjra'aj jamuaata'an, ajta siaj sij a'íjci jitze aróoca'neye i júuricama'ra' i Dios, siata'aj sij jéetze' tyámua' naa tyityaaju'un, ¹² tyata'aj tyij ca'nyíjra'aj huatáta'an síij ajta síij, a'íjci jime' tyaj taxa'aj tyá'tzaahuatye' taxié'vi'ra' jime'.

¹³ A'yaa nu tyá'xie've' nye'ihuáamua', siaj jáamua'reej nyaj mue'tíj jaaxá'pui'intarej nyaj a'áa ja'tanyéj ja'mua jimi, ajta nyati'ijta jaaxá'pui'intare'en nyaj a'yan huárinyij, tyi'tíj pu je'ej rinyij ney nyij quee a'áa jó'me'en. A'yaa nu tyá'xie've' nyaj a'yan cha'taj nyana'aj tyaamue'tin ja'mua jimi i nyaj jin tyu'tátuui're'en i Dios jimi, je'ej nyaj nyeríj tyaamue'tij séecan jimi i tyeítyee i maj séej chuéj japua jo'cháatimee. ¹⁴ A'yaa nu nyeríj a'íjci jin tya'tányaraj ney nyij tyihuo'té'examatye'en a'íjima i maj Grecia já'ma'can, nyajta a'íjima i maj séej chuéj japua já'ma'can, tipua'aj jéehua maj tyojó'itej nusu i maj quee tyojó'itej; ¹⁵ a'íj nu jin jéehua jaxie've' ney nyajta jamuaaté'examatye'en i nyúucarij i ti jin i Dios ja'mua japua huatányuunyij, mua'ajmaj mu siaj Roma ja'chej.

I ti jin uhuájca'neye i nyúucaria'ra' i Dios

¹⁶ Capu nyetyevi'raste' a'íjna i nyúucarij, ji'nye a'íi pu pué'een i Dios ti jin uhuájca'neye ta'aj ij néijmi'caa huáhuüre'en i maj tyá'antzaahuatye'sij, anaquéej mu a'íimaj i maj Israel jitze ajtyáma'can, majta je'en i maj séej chuéj japua já'ma'can. ¹⁷ Ji'nye a'íjna i nyúucarij jitze pu séejre' ti i Dios tyámua' ta'uurej, a'íjci jime' i tyej tyá'tzaahuatye', ti'ij na'aj tyo'huatyóochesij ajta jusén jime'. A'yaa

pu tyé'yusi' i yu'xarij jitze tijin: "A'íjna i ti naa tyí'tyevij, a'íi pu júurij huatyá'ítzeere'ej a'íjci jime' i ti tyá'tzaahuatye'."

I maj jin já'ítzeere' i Dios jimi

¹⁸Ajta i Dios pu jaséjrataj i ti jin nyú'camui' puéjtzij hua'tá'caria'aj néijmi'caa i tyeétyee i maj je'ej pua'aj tyí'tyetyeityee, i maj quee tyi'tá'caa ti séjre'ej a'íjna i ti jir'é'can jime'. ¹⁹Ajta i Dios ti jimi í'ríj ti a'táj jáamua'tyij a'íi mu meríj jamua'tyey, jì'nye Dios pu jusíj arí huo'taséjra. ²⁰Ti'íj na'aj i Dios tyeetyátaahuaca' i cháanacaj i ti yujo'vá'ca'aj, tyámua' pu naa tyé'miteere' je'ej ti een i muárie'ria'ra', ajta quee a'náj huatyápua'rij ti'íj na'aj yutij jo'que'tij ja'mej, jì'nye a'yaa pu tyí'sejre' je'ej ti een i Dios. A'íj pu jin quee je'ej tyí'rij ti a'táj séej jitzán tyo'oju'pua'ritye'en. ²¹Tyij majta meríj jamua'tyey i Dios, camu jaatyátzaahuatyej, camu majta tyaatatyójtzi'rej. Sulu a'íj mu jitze ucájrurij maj a'íjci jitze tyú'mua'tyij i mua'tzíira'aj tiquee tyi'táj huiire', capu ij che' huatá'íriitarij ti tyámua' tyihuo'támiteeraste'en tzáahuatyí'ra'aj jime'. ²²A'yaa mu tyí'xajta'ca'aj tijin tyámua' tu metyityoomuámua're', ajta a'yaa pu tye'rájraa maj jéetze' quee ma'umuámua'ria'aj muá'raa. ²³Jì'nye mu'ríj seequéj tyú'ruuj séecan mu'uj mij pujmua' najchej tiquee Dios pué'een, ti a'yan huasé'rin ti'íj tyévij, na'ríij ti'íj pína'aj, nusu tyi'táj ti muáacuacaa iira'íicajmee ca' tyi'táj ti huací'nyeyi'ij.

²⁴A'íj pu jin i Dios mahuoohuá'xij a'íijma i maj je'ej pua'aj meríj tyityo'cájrurij, majta tyévi'si' ricij i juxa'aj tyeétyee jamuán. ²⁵A'íi mu yo'huá'xij i ti jir'é'can jime' i Dios jimi, a'íj mu jéetze' á'astijre' i ti huetz'ij, majta a'íj jimi jutzaahuatye' i maj tyí'najchej i Dios ti tyú'taahuaca', camu che' a'íjci i Dios i ti néijmi'i tyú'taahuaca', tyej tyij tyámua' tyaatá'an ti'íj na'aj jusén jime'. Che' a'yan atyojo're'nyey.

²⁶A'íj pu jin i Dios a'yan metyihuohuá'xij mata'aj mij tyévi'si' huataséjre'en. Majta a'íimaj i maj úuca, a'íi mu jaatapuá'citaca' maj antyóonaxcaj i tyétyacaa jamuán, mej mij seequéj huárinyij je'ej tiquee i Dios ényey'que' huo'tyá'jto. ²⁷Majta a'íimaj i tyétyacaa, a'yaa mu cha'taj mana'aj tyaatapua'citaca' mej mij quee che' majta hua'antyáanaxcaj i úuca je'ej ti i Dios tyihuo'tyá'jto. A'yaa mu huaríj mej mij juxa'aj tyétyacaa jamuán huóoxana'cire'en a'íjci jime' i ti je'ej pua'aj een ti hua' tzajta' eerányinyii, a'yaa mu mij tya'ajpuéjtzij a'íjci jime' i maj huápu'íj je'ej pua'aj ricij.

²⁸Majta quee jaaxie've' maj jáamua'tyij i Dios, a'íj pu jin a'yan metyihuohuá'xij, mej mij a'yan huárinyij je'ej tiquee tyi'tyéevijtáj ²⁹Néijmi'i pu hua' jimi séejre' i ti je'ej pua'aj een, a'íi mu juxana'cire', majta jéehua tyí'nyacua'aj, je'ej mu pua'aj tyí'tyetyeityee. A'íi mu majta tyú'jaaxie'jvi', majta tyí'tyacui'caa, jéehua mu majta jutya'racia, majta jujíimua'aj jucuanamuajcaa, majta mu je'ej pua'aj

huá'uurej i ju'ihuáamua', majta je'ej pua'aj tyí'xaxa'aj. ³⁰ Je'ej mu pua'aj tyihuá'xaj i juxa'aj tyeítyee, majta jájcha'íire' i Dios, majta hua'xaahuaj i juxa'aj tyeítyee, majta óotzaahuatye', majta hue'tzij jutaavijre', majta quee huá'tzaahuatye' i juhuásimua'. ³¹ Camu jaxie've' maj tyihuojo'itéej muá'ra'nyij, camu ja'rá'astyaa i junyúuca, camu hua'xie've' i jutyeítyeristyamua', camu tyá'cu'vej. ³² Máamua'reej je'ej ti Dios arí tyaaxá'pui'intarej tijin néijmi'i mu cui'nyij i maj a'yan ricij, capu hua' jitze juxie've', móoche' mu a'yan ricij, ajta pu naa hua'asej maj séecan a'yan cha'taj mana'aj rijcaj.

Dios pu tzáahuatyi'ra'aj jin huá'xijtye'en i tyeítyee

2 ¹Tipua'aj muáaj a'tíj jitzán petyí'pua'ritye'ej, capu i'ríj paj a'yan tyu'taxáj yee capáj muáaj tyi'tíj jin je'ej pua'aj huaríj, ji'nye muáaj paj a'yan cha'taj pana'aj je'ej pua'aj tyi'tyía'cha'ij mati'ij a'íimaj. ² Tyajta a'yan tyá'mua'reej ti i Dios tzáahuatyi'ra'aj jin huá'xijtye'en a'íijma i maj je'ej pua'aj tyityetyúucha'ij. ³ Ajta muéetzij jime', mu paj séecan á'xijtye' pajta a'yan cha'taj pana'aj je'ej pua'aj tyi'tyía'cha'ij, capáj a'yan tyi'mua'ajcaj yee capu nyéetzij i Dios puéjtzij naatá'sij. ⁴ Muáaj paj jaatyáxaahuataca' a'íjci i Dios ti jéehua tyámua' tyimuatá'caa, ajta muá'cu'vej, ajta a jime' tyi'ijchó've', ajta muéetzij quee je'ej muá'miteeraste' ti i Dios tyámua' tyimuatá'caa pej pij jitzán ajtyáma'cantaj puá'ra'nyij. ⁵ Pajta muáaj, capáj ma'úumua'rej a'íj paj jin quee jaxie've' paj ja'antzaahuatye'en i Dios, a'yaa pej pij jéehua tyi'tyá'asiiri'tze'sij i puéjtzij ti'ij a'ájna atyojo're'nyej a'náj ti i Dios a'yan huataséjre'sij ti'ij néijmi'caa to'xíjtye'en tzáahuatyi'ra'aj jime', ⁶ ajta je'en a'yan tyihuo'tá'an séej ajta séej je'ej ti síj tyi'tíj jin huaríj. ⁷ Dios pu huo'ta'sij maj jusén jin júurij muá'ra'nyij a'íimaj i maj xá'pui' huaríj, majta jajchó'va'ca'aj ti Dios tyámua' tyihuo'tá'an, ⁸ ajta i Dios pu nyu'camui'ij puéjtzij huo'ta'sij a'íijma i maj je'ej pua'aj tyityetyúucha'ij, i maj a'ájna jitze jutyamua've' i ti je'ej pua'aj een. ⁹ Jéehua mu jajpuéetzij muá'ju'un a'íimaj i maj je'ej pua'aj tyityetyúucha'ij, anaquéj mu a'íimaj i maj Israel jitze ajtyáma'can, majta je'en a'íimaj i maj séej chuéj japua jo'cháatimee. ¹⁰ Ajta i Dios pu tyámua' tyihuo'tyátoosij a'íimaj i maj tyámua' tyityetyúucha'ij, ajta huo'tyátzaahuatye'sij, ajta tyámua' tyihuo'tyéjeevij jusén jime', anaquéecan a'íijma i maj Israel jitze ajtyáma'can, ajta je'en a'íijma i maj séej chuéj japua já'ma'can. ¹¹ Ji'nye néijmi'i mu juxa'aj mana'aj een i Dios jimi.

¹² Néijmi'i i maj quee xá'pui' ricij majta quee a'náj ja'ancuriáa' i nyúucarij Moisés ti jaaxájtaca', a'yaa mu majta tyi'tyacui'nyij, majta a'íimaj i maj juxana'cire', a'yan metya'mua'rériaj je'ej ti tyaaxájtaca' i Moisés, a'íi pu i nyúucarij huá'xijtye'en. ¹³ Ji'nye camu tyámua' een i Dios jimi a'íimaj i maj janamuaj mana'aj i nyúucarij, sulu a'íimaj i

maj a'yan ricij je'ej ti tyá'xaj i nyúucarij. ¹⁴Ji'nye a'íimaj i maj séej chuéj japua já'ma'can, i maj quee a'náj ja'ancuriáa' i nyúucarij, a'yaa mu tyá'astijre' je'ej maj jujíimua'aj mana'aj tyéejtyoovej i jutzájta', a'íj mu jin jujíimua'aj tyúu'ijtye' i junyúuca a jime', ¹⁵a'íimaj mu a'yan tyúusejrataj je'ej ti tyá'xie've' i nyúucarij i maj jin tyí'ijta, a'íi pu hua' tzajta' séejre'. A'íi pu ajta jaséjrataj i maj jin ma'umuámua're', ajta i hua'mua'tziira'aj pul'ij hua' jitze tyo'ojpuá'ritye'ej nusu hua' japua huatányuusij, ¹⁶a'ájna xicáara' jitze ti'íj i Ciriístu' huá'xijtye'en i Dios jitze ma'can, néijmi'caa i tyeétyee je'ej maj tyi'tíj huáruuj avítzij jime', ajta i nyúucarij jitze ma'can i ney nyáaj jamuáa'ixaa.

A'íimaj i maj Israel jitze ajtyáma'can, ajta i nyúucarij Moisés ti jaatyájtóo

¹⁷Pajta muáaj mu paj a'íjci jitze ajtyáma'can i Israel, pajta já'astijre' a'íjci i nyúucarij i maj jin tyí'ijta, pajta á'tzaahuatye' i Dios jimi. ¹⁸Páamua'reej je'ej ti a'íin tyá'xie've', pajta jamua'tyej a'íjci i nyúucarij i ti tyí'muamua'tyej pej pij tyámua' eenye'. ¹⁹A'yaa paj tyí'mua'tzej paj jaayí'tin paj tyihuó'mua'tyej a'íjma i maj quee a'náj tyi'huóomua'aj, pajta tyámua' tyihuó'tyéjeevej a'íjma i maj tíca'riste' séejre', ²⁰pajta a'yan tyí'mua'tzej paj jaayí'tin paj tyihuó'mua'tyej a'íjma i tiquee huá'miteeraste' je'ej ti tyi'tyéevijtij, nusu i maj quee óotzaahuatye', ji'nye a'íj paj jitze tyá'mua'tyej i nyúucarij i maj jin tyí'ijta, i ti ji'réc'can jime'. ²¹Tipua'aj a'yan petyihuá'mua'tyej i séecan, ¿ji'nye een jime' pequee a'yan tyi' amua'tyej asíj? Tipua'aj a'yan petyihuá'mua'tyej maj quee tyí'nahua'aj, ¿ji'nye pej pij muáaj tyí'nahua'? ²²A'yaa paj pajta tyihuá'ixaatye' tijin maj quee juxana'ciria'aj, ¿ji'nye pej pij muáaj tyí'xana'cire'? Tipua'aj quee mua'ránajchij maj hua'najchej i sáanturij, ¿ji'nye pej pij tyí'nahua' hua' tyeyúuj tzajta'? ²³A'íj paj jitze á'tzaahuatye' i nyúucarij i maj jin tyí'ijta, pajta períj jaatyáxaahuataca' i Dios, ji'nye capáj a'yan ricij je'ej ti a'íin tyí'ijta. ²⁴A'íj pu jin a'yan tyé'yu'si' i yu'xarij jitze tijin: "A'íimaj i maj quee tyá'tzaahuatye' mu je'ej pua'aj yó'sej i Dios, ji'nye mua'aj xu quee xá'pui' ricij."

²⁵A'yaa pu tyi'ja'yájna tijin a'íjna i ti já'astijre' a'íjci i nyúucarij i maj jin tyí'ijta, tyi'tíj pu jin je'ej tyeetyáhuire'ej, ajta tipua'aj quee a'yan rijcaj je'ej ti tyí'ijta i nyúucarij, a'yaa mu ja'uurej mati'ij huó'ruuj a'íjma i maj séej chuéj japua já'ma'can. ²⁶Ajta tipua'aj a'íjna i ti séej chuéj japua já'ma'can já'astijria'aj i nyúucarij i maj jin tyí'ijta, a'yaa mu jaatámua'sij tijin Israel pu jitze ajtyáma'can, tyij ajta quee a'yan tyi'ja'yájnatan. ²⁷A'íjna i ti a'yan ricij je'ej ti tyí'ijta i nyúucarij, tyij ajta quee ja'antyisíjchaca' i junavíj, a'íi pu ja'xijtye'en a'íjci i ti ja'ancuriáa' i nyúucarij ajta ja'antyisíjchaca' i junavíj. ²⁸Ji'nye a'íjna i ti Israel jitze ajtyáma'can, capu a'íi na'aj juxie've' i ti jéjre'citze'

séejre', ajta tipua'aj ja'antysisjchaca' i junavíj, capu ajta a'íi na'aj juxie've' tí'ij a'yan eenye' i jutyévij jitze. ²⁹A'íjna i ti tzáahuatyí'ra'aj jín Israel jitze ajtyáma'can, a'yaa pu ajta een i jutzájta', ajta a'íjna i ti ja'antysisjchaca' i junavíj, a'yaa pu huatóomua'aj ti tyámua' een i juxiéjnyu'caa tzajta', capu a'íi na'aj i ti tyé'yu'si' i yu'xarij jitze, sulu a'íi pu jéetze' juxie've' i júuricama'ra' i Dios. A'táj ti a'íjna jín néijmi'i a'yan ricij, a'íi pu tyámua' een, ajta quee i tyeétyee jimi je'ráma'can, sulu i Dios pu jimi je'ráma'can.

3 ¹A'yaa pu'íj, ¿nyiquij tyi'táj jín je'ej tye'tyáhuí'rii a'íjci i a'táj ti Israel jitze ajtyáma'cantaj nusu i ti ja'antysisjchaca' i junavíj? ²A'yaa pu tyi'ja'yájna ti jéehua tya'ancuriáa'sij, ajta jéehua jatyáhuí'rii, ji'nye Dios pu anaquéj jaatyájtóo i junyúucaa a'íjma jimi i maj Israel jitze ajtyáma'can. ³¿Ji'nye na'quij tye'mej? ¿Nyiquij i Dios ajta je'ej pua'aj rinyij a'íjna jime' i maj meríj i tyétyacaa je'ej pua'aj huaríj? ⁴Capu xaa nyu'uj. Dios pu tzáahuatyí'ra'aj jín séejre' ajta ji'récán jime' tí'ij na'aj jusén jime', tyij majta i tyétyacaa jéehua tyí'hue'tacaa, miche' a'yan eenye', ji'nye a'yaa pu tyé'yu'si' i yu'xarij jitze tíjin:

A'yaa mu tyá'mua'reeren paj tyámua' tyi'tyá'cha'ij a'íjna jime' je'ej paj tyí'xaj,
pajta tyu'tyámue'tij mati'ij muá'xijtye'ej.

⁵Ajta tipua'aj a'íjna jime' i tyaj je'ej pua'aj ricij jín séjre'ej ti i Dios ji'réenye'ej séejre', ¿ji'nye tyetyu'taxájtaj? ¿Nyiquij a'yan tyetyu'taxájtaj ti i Dios quee xá'pui' ricij tí'ijta puéjtzij taatá'an? (A'yaa mu tyí'xaj a'íimaj i maj quee jamua'tyej i Dios.) ⁶¿Catu xaa nyu'uj! Ji'nye tipua'aj i Dios quee tyi'táj tyámua' uuriaj ityájma jimi, ¿ji'nye tyí'rij tí'ij huoxájtye'en néijmi'caa i maj yan huacháatimee i cháanacaj japua?

⁷Ajta tipua'aj a'íjna i nyaj jín tyí'hue'taj a'yan tyí'huire'ej tí'ij i Dios jéetze' tyámua' huataséjre'en, ¿ji'nye een jime' i Dios a'yan tyiná'xijtye' a'íjci jime' i nyaj jín ootyá'itzee jimi? ⁸Ajta tipua'aj a'yan tyí'eenye', ¿nyij a'yan tyúuxie've' tyaj je'ej pua'aj huárinyij ta'aj ij a'íin huataséjre'en i ti naa een? A'yaa mu séecan nye jitze tyí'pua'ritye' mej mij tyina'antyi'uunyi' je'ej nyaj tyihuá'mua'tyej, ajta a'íjma a'yaa pu tyihuá'ci'tyij mej mij jajpuéetzij muá'ra'nyij.

Néijmi'i tu á'itzeere' i Dios jimi

⁹¿Ji'nye na'quij? ¿Nyiquij jéetze' tatyáhuí'rii ityájma i tyaj Israel jitze ajtyáma'can? Capu xaa nyu'uj, ji'nye tu'ríj a'yan tyaataxájtaca' tíjin a'íimaj i maj Israel jitze ajtyáma'can, majta i maj séej chuéj japua já'ma'can, néijmi'i mu meríj je'ej pua'aj huaríj, ¹⁰ji'nye a'yaa pu tyé'yu'si' i yu'xarij jitze tíjin:

Capu síij a'táj séejre' ti tyámua' tyi'tyúucha'íij.

- 11 Capu a'tíj séejre' ti tyojó'itej,
capu ma' a'tíj ti jahuoocaj i Dios.
- 12 Néijmi'i mu meríj je'ej pua'aj huaríj,
majta néijmi'i meríj huóoxana'cirej.
Capu ma' a'tíj ti tyámua' tyi'tyúucha'íij.
Capu na'aj síij a'tíj ma' já'sejre'.
- 13 Je'ej pu pua'aj namuajre' je'ej maj tyí'xaj,
ajta i hua' nyanúu pu jéehua tyí'hue'tacaa,
hua' tyenyij jitze pu aviitzi' i huá've'rij cú'cu'uj ti jitze éejnyinyii
- 14 ajta i maj jin je'ej pua'aj tyihuo'xáj i juxa'aj tyeétyee, mej mij
tyúujaaxiejvi'.
- 15 Ca'nácan mu jo'huáchajci'ij mej mij séej huajé'caj,
16 jéehua pu je'ej pua'aj tyí'een jo'maj joojú',
17 camu jamua'reej je'ej maj juxáahuaj tyí'tyesejre'ej.
- 18 Capu je'ej huá'miteeraste' mej mij jaatyátzaahuatye'en i Dios, nusu
maj jáatziinye'en.
- 19 A'yaa tu tyá'mua'reej tijin néijmi'i je'ej ti tyá'xaj i yu'xarij
jitze, a'yaa pu tyihuá'ixaatye' a'íijma i maj a'íjna jin tyí'íjta, mej mij
néijmi'i tyu'tyátzaahuatye'en, majta néijmi'i i maj a'yan huacháatimee
i cháanacaj japua jáamua'reej maj quee xá'pui' huaríj i Dios jimi,
20 ji'nye capu i'ríj ti a'tíj a'yan tyu'taxáj yee néijmi'i pu ará'astej i
nyúucarij, tí'ij ajta a'yan tyúuxie've'ej tí'ij Dios a'yan jaatámua'tyij
yee tyámua' pu tyi'tyúucha'íij, ji'nye a'íjna i nyúucarij i maj jin tyí'íjta
a'yaa pu tyí'huüre' tyej tyij a'íjna jin jáamua'reej i tyaj jin quee
xá'pui' huaríj.

Je'ej ti tyí'rij tyaj ji'r'é'nye'ej huatyá'itzeere'en i Dios jimi

21 Ajta ijíij, Dios pu arí a'yan tyitaataséjra je'ej ti tyí'rij tyej tyij
ji'r'é'nye'ej jimi huatyá'itzeere'en, ajta a'yan cha'tána'aj tyí'ta'ixaatye'
a'íjna i nyúucarij, majta a'íimaj i maj ará'tyeej tyí'xajtaca'aj i Dios
jitze ma'can, 22 a'íjna i sij jin tyá'tzaahuatye' i Ciríistu' jimi, a'íj
pu jin i Dios tyámua' tyajamuaatyátoosij. Ji'nye néijmi'i mu juxa'aj
mana'aj een i Dios jimi, 23 néijmi'i mu meríj ootyá'itzee, a'íj mu jin
a' imuáj já'sejre' i Dios jimi. 24 Ajta i Dios pu juxié'vi'ra' jin a'yan
tyihuo'xá'pui'intari'ri' mej mij ji'r'énya'aj huatyá'itzeere'en, a'íj pu
jin hua' japua huatanyúj a'íjci jime' je'ej ti huaríj i Ciríistu' ti ajta
Jesús pu'éen. 25 Dios pu a'yan jáaruuj tí'ij i Ciríistu' je'ráxire'en i
juxúure', ajta je'en a'íjna jin tyihuo'tú'uunyi' i maj jin ootyá'itzee. Ajta
tí'ij tyihuo'tú'uunyi' a'yaa pu tyúuxie've' maj tyá'antzaahuatye'en.
Dios pu a'yan tyaataséejrataca' je'ej ti a'íin tyámua' ta'uurej,
tyitaata'úunyi'ran a'íjna i tyaj jin aamí' ootyá'itzee, 26 ji'nye a'íi pu
tajíme' tyi'íjchó've'ej. A'yaa pu huaríj mej mij a'íimaj i tyeétyee ijíij
maj séejre' jaaséj i ti a'íin tyámua' táaruuj, ji'nye a'íi pu ji'r'énya'aj

séejre', a'yaa pu'lij ajta tyámua' huá'uurej a'íjma i maj tyá'tzaahuatye' i Jesús jimi.

²⁷ ¿Jo'nyij je'ej je'en a'íjna i ti jin i tyéviy óotzaahuatye' i Dios jimi? Capu che' ma' já'sejre', ¿ji'nye een jime'? Capu a'íjna jime' maj ja'rá'astijrej i nyúucarij i maj jin tyí'ijta, sulu a'íjna jime' i maj tyá'antzaahuaj i Círíistu' jimi. ²⁸ A'yaa tutyij tyá'mua'reej tijin: Dios pu tyámua' ja'uurej i tyéviy, capu ij tyi'táj je'ej tye'tyáhu'i'rii ti néijmi'i ará'astijre'en a'íjci i nyúucarij i maj jin tyí'ijta.

²⁹ ¿Nyiquij i Dios a'íjma na'aj hua' Dios i maj Israel jitze ajtyáma'can? ¿Nyiquee hua' Dios pu'éen a'íjma i maj séej chuéj japua já'ma'can? Jee xaa nyu'uj, a'íi pu ajta hua' Dios pu'éen néijmi'caa i maj séej chuéj japua já'ma'can, ³⁰ ji'nye sáij pu'uj séejre' i Dios, a'íi pu a'íin pu'éen i ti tyámua' huá'uurej a'íjma i maj tyá'tzaahuatye', ajta quee jitzán juxie've' tipua'aj Israel jitze mua'ajtyáma'cantaj nusu mequee. ³¹ ¿Nyiquij a'íjna jin tyá'uunan a'íjci i nyúucarij i maj jin tyí'ijta a'íjci jime' tyej tyá'tzaahuatye'? Catu xaa nyu'uj. Sulu a'íj tu jin a'yan tyá'nejmi'tare'en.

Je'ej ti huaríj a'íjna i Abraham

4 ¹ ¿Ji'nye tyana'aj tyij tyaataxájta je'ej ti tyi'táj tyu'mué'tij i Dios jimi a'íjna i Abraham? ² A'yaa xaa nyu'uj tyi'ja'yájna, tipua'aj a'yan metyáamua'tyijche' i Abraham yee tyámua' pu tyí'tyevij a'íjci jime' je'ej ti tyi'táj huáruuj, aj pu xaa i'ruítacaj ti jusíj ahuóotzaahuatye'nyijche', ajta capu je'ej tyi'riij ti a'yan huárinij i Dios jimi. ³ Ji'nye a'yaa pu tyé'yu'si' i yu'xarij jitze tijin: “Abraham pu ja'antzaahuaj i Dios, a'íj pu jin i Dios a'yan tyaamua'aj ajta a'yan tyaataxájtaca' tijin tyámua' pu tyí'tyevij.” ⁴ Ajta a'yájna tipua'aj a'táj tyi'táj jin tyí'muarie'ej, camu tyi'táj jaatapu'éjve'sij juxié'vi'ra' jime', sulu metyá'najchitye'en a'íjci jime' i ti a'íin tyu'muáriej. ⁵ Ajta tipua'aj a'táj tyá'tzaahuatye'ej ti i Dios jaayí'tin ti tyámua' jáa'uurej i tyéviy ti jéehua jimi á'itzeere', Dios pu ajta a'yan tyaataxájta ti tyámua' tyí'tyevij a'íjna i a'táj, tyij ajta quee tyi'táj xá'pui' huáruuj. ⁶ David pu a'yan cha'tána'aj tyu'taxájtaca' a'íjci jime' i a'táj ti Dios a'yan tyá'xaj yee ti tyámua' tyí'tyevij, quee a'yan tyaataxáatan tyi'táj ti je'ej huáruuj. ⁷ A'yaa pu tyu'taxájtaca' i David tijin:

Miche' huatóotyamua've'en a'íimaj i Dios ti tyihuo'tú'uunyi'ri' i maj jin quee xá'pui' huaríj a'íjci jimi.

⁸ Che' huatóotyamua've'en a'íjna i tyéviy ti Dios quee jitzán tyí'pua'ritye' i ti jin ootyá'itzee a'íjci jimi.

⁹ ¿Nyiquij a'íjma na'aj ci'puaj i maj meríj ja'antysisíjchaca' i junavíj, a'íjna i ti jin Dios tyámua' tyihua'tá'caa, ca' ajta hua'ci'puaj i séecan i maj quee a'yan tye'entysisíjchaca' i junavíj? A'yaa tu tyeríj tyaataxájtaca' a'íjci i Abraham, ti Dios a'yan jaatamua'aj tijin tyámua'

pu tyí'tyevij a'fjci jime' ti a'fín tyá'antzaahuaj. ¹⁰Ajta, ¿a'najnyí a'yan tyaataxájtaca' i Dios? ¿Nyiquij tí'ij i Abraham ja'antysisíjchaca' i junavíj ca' tí'ij quee xu ja'antysisíichava'caj? Capu tí'ij ja'antysisíjchaca' i junavíj, sulu jájcua'j imuáj pu a'yan tyaataxájtaca'. ¹¹Aj pu'ij Abraham ja'antysisíjchaca' i junavíj, mej mij jáamua'reej tíjin Dios pu arí a'yan tyaataxájtaca' ti tyámua' tyí'tyevij, a'fjci jime' ti tyá'tzaahuatye'. A'fj pu jin i Abraham a'fín pué'een i hua' táataj néijmi'caa i maj tyá'tzaahuatye', tyij majta quee xu ja'antysisíjchaca' i junavíj, Dios pu a'yan cha'taj na'aj tyihuo'taxájtaj tíjin tyámua' mu tyí'tyetyeityee. ¹²Ajta i Abraham, a'fí pu ajta hua' táataj pué'een i maj ja'antysisí'chej i junavíj, ajta a'fíjma i maj tyámua' tyityetyúucha'ij tí'ij ajta a'fjna i Abraham, ti ajta tyá'tzaahuatya'ca'aj tí'ij quee xu ja'antysisíichava'caj i junavíj.

I ti jin Dios tya'tóoratziiri' a'fíjma jimi i maj Abraham jitze eeráma'can

¹³A'yaa pu i Dios tya'táratziiri' a'fjci i Abraham, ajta a'fíjma i maj jitzán eeráanyesij ti a'yan tyihua'ci'tyij néijmi'i i cháanacaj, capu a'yan tya'tácatyij a'fíjma jimi i maj ja'rá'astej a'fjci i nyúucarij i maj jin tyí'ijta, sulu a'fíjma jimi i maj tyámua' tyityetyúucha'ij majta tyá'tzaahuatye'. ¹⁴Tipua'aj a'fíimaj a'yan tyi'tíj metya'ancuria'an i maj já'astijre' a'fjci i nyúucarij i maj jin tyí'ijta, capu ij che' tyi'tíj je'ej tyí'huire' i maj jin tyá'tzaahuatye', capu ajta che' tyi'tíj huire' i ti jin Dios tya'tóoratziiri'. ¹⁵Ji'nye puéjtzij pu hua'tá'caa a'fjna i nyúucarij i maj jin tyí'ijta, ajta jo'tij quee já'sejre' i nyúucarij maj jin tyí'ijta, camu majta tyi'tíj jin já'itzeere' a'fjci jimi i nyúucarij.

¹⁶A'fj pu jin, ta'aj ij a'fjna i ti jin i Dios tya'táratziiri' i Abraham a'fíjma jimi huatyá'itzeere'en i maj jitzán eeráma'can, a'yaa pu huáapua'aj hua' jimi tyí'sejre' a'fjna jime' i maj tyá'tzaahuatye'. A'yaa pu'ij huatóomua'aj tíquee a'fíjma na'aj jimi tya'tóoratziiri' i maj ja'astej i nyúucarij i maj jin tyí'ijta, sulu a'fíjma pu ajta jimi i maj a'yan cha'taj mana'aj tyá'tzaahuatye' tí'ij i Abraham. A'fj pu jin a'fín pué'een i tataataj néijmi'caa ityájma, ¹⁷a'yaa pu tyé'yu'si' i yu'xarij jitze tíjin: “A'yaa nu tyimua'antyaárujtye pej pij hua' táataj pué'eenye' mui'caa i tye'ityee.” A'fí pu a'fín pué'een i Dios, i Abraham ti jimi tyá'antzaahuaj, a'fí pu a'fín pué'een i Dios ti jaayí'tin ti huo'tájuuritye'en a'fíjma i maj meríj huácuij, ajta tyí'taahuaj tyi'tíj tíquee xu tyí'sejre'.

¹⁸Ajta a'fjna i Abraham, a'yaa pu tyá'antzaahuaj maj mue'tíj jitzán eeráanyesij i tye'ityee je'ej ti Dios tya'táratziiri', a'fj pu jin a'fín pue'éenye'ej ta'raj i hua' táataj mui'caa i tye'ityee, a'yájna tí'ij i Dios tyaaté'exaa tíjin: “Mue'tíj mu i tye'ityee a' jitze eeráanyesij.” ¹⁹Ajta i ti jin tyá'tzaahuatya'ca'aj a'fjna i Abraham capu huatyápuariaca',

majta arí tin anxityej nyinyi'ra'aj jájcha'iica'aj, ajta a'íjna i Sara ti íira'ra'an pu'éenye'ej a'íi pu ajta arí ucarístaca'aj, a'íj pu jin a'yan tyí'mua'ajcaa ti quee che' je'ej tyí'riitaca'aj mej mij tyiyóoj muá'ra'nyij. ²⁰Capu jaatáxaahuataca' capu ajta quee che' jitzán tyi'ca'nyajca'aj je'ej ti i Dios tyatáratziiiri', sulu jéetze' pu tyá'antzaahuaj. Ajta tyaatatyójtzi'rej i Dios, ²¹a'yan tyá'tzaahuatye'ej ti i Dios a'yan rinyij je'ej ti arí tyatáratziiiri'. ²²A'íj pu jin i Dios a'yan jaatamua'aj a'íjci i Abraham ti tyámua' tyi'tyúucha'iica'aj a'íjci jimi.

²³Ajta a'íjci jime' ti i Dios a'yan jaatamua'aj, capu a'yan tyé'yu'si'huaca'aj ti'ij a'yaa na'aj tyáaci'tyij a'íjci i Abraham, ²⁴sulu a'yaa pu ajta tyo'tyéyu'si'huaca' ityájma jimi. Ji'nye Dios pu a'yan cha'taj na'aj tyí'tamua'tyiej a'íjci jime' i tyaj jin tyá'tzaahuatye', tipua'aj tyetyá'antzaahuatye'en a'íjci jimi i ti jaatájuurityej a'íjci i Jesús ti tavástara' pu'éen, ²⁵i ti huatátuihuaca' ti'ij tajitzé ma'can huámui'nyij, a'íjci jime' tyaj quee xá'pui' huaríj i Dios jimi, ajta je'en Dios jaatájuurityej ti'ij ityájma tyámua' tyitaatyátoonyij.

I tyaj jin jáamua'reej ti i Dios jéehua taxie've'

5 ¹Dios pu arí tyámua' tyitaatyájtoo, a'íjci jime' i tyej tyá'tzaahuatye', pu'ríj tyaj taxáahuaj séjre'ej i Dios jimi, tyajta tyaatatyójtzi're'en a'íjci i tavástara' Jesús i ti ajta Ciriístu' pu'éen. ²Ji'nye a'íi pu i Ciriístu' taatá'i'riityej tyej tyij ajtyáxiirej i Dios jimi, a'íjci jime' i tyej tyá'tzaahuatye', tyej tyij huátatyamua've'en a'íjna jime' i ti tyámua' tyitaatyájtoo, tyámua' tutyij een, tyajta tatyamua've' a'íjci jime' tyaj jajchó've' a'ájna xicáara' i tyaj jamuán séeria'aj tá'ra'nyij i Dios. ³Ajta quee a'íi na'aj, sulu a'íj tu tyajta jin tatyamua've' i tyaj jajpuéjtzij, ji'nye a'yaa tu tyá'mua'reej tíjin a'íi pu ca'nyíjra'aj tatá'caa tyej tyij tyo'táviicue', ⁴ajta i tyej tyámua' eenye' pu tatá'caa tyej tyij jéetze' tyámua' huárinyij, ajta i tyaj jéetze' tyámua' eenye' pu tatá'caa tyej tyij tyi'íjchó've'ej tyaj a'áa jo'tyá'itzeere'en i Dios jimi. ⁵Ajta i tyaj jin tyi'íjchó've' capu a'náj taatatyévi'raste'sij, ji'nye Dios pu ca'nyíjra'aj taatá' i tatzájta', a'íjci jime' ti ju júuricamej ityájma jimi huatyájto.

⁶Ji'nye tyati'ij ityáj quee pújooriajva'aj tyaj tajapuá huatányuunyij, Ciriístu' pu tajitzé ma'can huamuí' néijmi'caa ityájma i tyaj quee xá'pui' huaríj. ⁷Jéehua pu tyési' ti a'tíj séej jitze ma'can huámui'nyij. Capu ajta a'tíj óoca'nyej ti séej jitze ma'can huámui'nyij i tyévij ti tyámua' tyí'tyevij, nusu xaa a'tíj óoca'nyej ti jitzán ma'can huámui'nyij i a'tíj ti jéehua huápuí'ij tyi'tíj xá'pui' huáruuj jimi. ⁸Ajta i Dios pu a'yan tyitaataséjratyiej ti huápuí'ij taxie've', ji'nye tyati'ij tyooj jéehua a'itzéeria'caj a'íjci jimi, Ciriístu' pu tajitzé ma'can huamuí'. ⁹Ajta ijíj, ti'ij i Dios tyámua' tyitaatyájtoo a'íjci jime' ti Ciriístu' tajitzé ma'can huamuí', tyámua' pu'ij jéetze' tyí'tahuíire' ti'ij

quee i puéjtzij táaci'tyij. ¹⁰A'yaa pu tyi'ja'yájna, ji'nye tyati'ij tyooj jajcha'íria'caj i Dios, a'íi pu tyámua' tyitaatyátoo a'íjci jime' ti i yójra' tajitzé ma'can huamuí', jéetze' pu'ij tajapua' huatányuusij, tyej tyij tyámua' tyityeetyá'itzeere'en, ijíj tyaj tyeríj jimí ajtyu'uj. ¹¹Ajta quee a'íi na'aj, sulu tyajta tu huatátatyamua've'sij i Dios jimi, a'íjci jime' ti i tavástara' Jesús i ti ajta Círíistu' pu'éen tyámua' táaruuj, tyej tyij tyámua' tyityeetyá'itzeere'en i Dios jimi.

A'íjna i Adán ajta a'íjna i Círíistu'

¹²A'yaa pu tyi'ja'yájna, síj pu'uj i tyévij ti je'ej pua'aj huaríj a'yan huataséjre i cháanacaj japua aj mu mij néijmi'i je'ej pua'aj huaríj, aj pu'ij a'yan atyojo're'nyej ti huamuí' a'íjna i a'tíj, a'íj mu mij jin majta néijmi'i huácuij i maj a'íjci jitze i tyévij eeráanyej, ji'nye néijmi'i mu majta ootyá'itzee i Dios jimi. ¹³Ti'ij quee xu huatyátuihuaca' i nyúucarij i maj jin tyí'ijta, mu'ríj a'yan tyityá'itzeeria'ca'aj i tyeítyee i Dios jimi, ajta títua'aj quee séjre'ej i nyúucarij i maj jin tyí'ijta, capu i'riitaca'aj ti séej a'yan tyo'xíjtye'en je'ej ti tyi'tíj jin tyo'tyá'itzee. ¹⁴Ajta ti'ij na'aj tyu'séjrej i Adán 'asta na'aj quee huataséjre a'íjna i Moisés, néijmi'i mu i tyeítyee huácuij i maj quee xá'pui' huaríj, tyij majta quee a'yan cha'taj mana'aj huaríj ti'ij a'íjna i Adán i tiquee ja'rá'astijrej je'ej ti i Dios tyaata'íj, ji'nye Adán pu a'yan éenye'ej ti'ij i ti ya'uvé'nyesij.

¹⁵Ajta i ti jin ootyá'itzee a'íjna i Adán, capu a'yan cha'tána'aj een ti'ij i ti Dios juxié'vi'ra' jin taatapuéjve. Ji'nye mue'tíj mu huácuij a'íjci jime' ti síj ootyá'itzee i Dios jimi, ajta a'íjna i Dios ti taatapuéjve, a'íjci jime' je'ej ti i síj i tyévij huaríj juxié'vi'ra' jime', a'íi pu a'íin pu'éen i Círíistu', jéetze' pu'ij tyí'huíire' ajta ti'ij tyámua' tyihuo'tyátoonyij mui'caa i tyeítyee. ¹⁶A'íjna i ti jin síj ootyá'itzee i Dios jimi, capu a'yan cha'taj na'aj een ti'ij i ti Dios taatapuéjve, ji'nye ti'ij síj i a'tíj ootyá'itzee i Dios jimi, aj pu'ij huataséjre i puéjtzij, ajta i Dios ti taatapuéjve, a'íjci jime' i maj jéehua ootyá'itzee a'íjci jimi, a'íi pu tatá'caa tyej tyij ji'r'é'nye'ej huatyá'itzeere'en a'íjci jimi. ¹⁷Ji'nye a'íj mu jin huácuij i tyeítyee a'íjci jime' ti síj na'aj i tyévij quee xá'pui' huaríj, jéetze' pu'ij i Dios tyámua' ta'uurej a'íjci jime' i ti taatapuéjve, tyej tyij ji'r'é'nye'ej huatyá'itzeere'en a'íjci jimi, a'íjci jime' je'ej ti huaríj a'íjna i tyévij, a'íjna i Jesús ti ajta Círíistu' pu'éen.

¹⁸Ajta a'íjna i ti jin quee tyámua' huaríj i Adán, Dios pu'ij néijmi'caa ooxíjtye i tyeítyee ti'ij puéjtzij huo'tá'an, a'yaa pu'ij ajta tye'rájraa mej mij néijmi'i ji'r'é'nye'ej huatyá'itzeere'en, a'íjci jime' je'ej ti huaríj i Círíistu' mata'aj mij júurij muá'ra'nyij jusén jime'. ¹⁹A'yaa pu síj na'aj i tyévij quee tya'rá'astijre je'ej ti i Dios tyaata'íj, a'íj mu jin mue'tíj ootyá'itzee i Dios jimi, a'yaa pu'ij ajta mui'caa tyu'c'íj mej mij ji'r'é'nye'ej huatyá'itzeere'en i Dios jimi a'íjna jime'

ti sáij i tyévíj ja'rá'astej i Dios, mej mij mue'tíj tyámua' huárinyij i tyeftye.

²⁰Ajta a'ájna i nyúucarij i maj jin tyí'ijta, a'yaa pu een jin huatyátuihuaca' ti'ij jéetze' huataséjre'en i maj jin ootyá'ítzee i Dios jimi, ajta ti'ij jéetze' huataséjre i maj jin ootyá'ítzee, Dios pu ajta jéetze' tyámua' tyihuo'tá' juxié'vi'ra' jime'. ²¹A'ájna i ti je'ej pua'aj een i Dios jimi, a'yaa pu tyihuo'mué'tij mej mij huácui'nyij, a'yaa pu cha'tána'aj tyu'tyámue'tij i ti jin Dios tyámua' tyitaatá', tyej tyij jí'ré'nye'ej huatyá'ítzeere'en, ajta tyej tyij júurij tá'ra'nyij jusén jime' a'ájci jimi i tavástara' Jesús ti ajta Círíistu' pu'éen.

Itiyáj tu júurij séejre' i Círíistu' jimi

6 ¹¿Ji'nye tyana'aj tyij tyu'taxájtaj? ¿Nyiquij tyooj atya'ítzé'rihua'aj tá'ju'un ta'aj ij i Dios jéetze' tyámua' tyihuojó'mua'raj? ²Catu xaa nyu'uj. Tu'ríj itiyáj huácuij a'ájci jimi i ti je'ej pua'aj een, ¿ji'nye ooj tyí'rij tyaj a'yan tyí'tyechaj ta'tya'ítzé'rihua'aj tyi'tíj jime' tiquee xá'pui' een i Dios jimi? ³¿Nyij sequéé jamua'reej, sij jimi ajtyáhuixij i Círíistu' siati'ij huái'huaca', tyajta je'en jitzán ajtyáma'cantaj ta'raa ti'ij a'áin huamuí'? ⁴Ji'nye tyati'ij huái'huaca' tyajta tu avá'nami'huaca' i Círíistu' jamuán, tyajta huá'cui'i'huaca' tyej tyij huatájuurej tyajta je'en jájcuán jin chajca, a'yájna ti'ij i Círíistu' tyu'tájuuriaca' a'ájci jime' i Dios ti néijmi'i jin putyí'uurej.

⁵Tipua'aj a'ájci jitze ta'ajtyáma'cantaj i Círíistu' ti'ij a'áin huamuí', tyajta tu jitzán ajtyama'cáantaj ta'raj ti'ij a'áin huatájuuriaca'. ⁶A'yaa tu tyá'mua'reej tíjin je'ej tyaj jájcuaj tyi'tyítacha'i'ica'aj a'áin pu ajta jamuán óotateehuaca' i Círíistu', ti'ij antyípuarej a'ájna ti je'ej pua'aj een i tyaj jin tyítacha'i'ica'aj, ti'ij quee che' ca'nyíjra'aj tatá'care'en a'ájna i ti je'ej pua'aj een. ⁷Ji'nye típuaj a'tíj arí huámuí'nyij, capu che' i'ríitaj ja'mej ti i ti je'ej pua'aj een tyaata'íjtye'en. ⁸Tipua'aj tyeríj jamuán huácuij i Círíistu', jitzán tutyij tyí'ca'nyej tyej tyajta jamuán júurij tá'ju'un. ⁹A'yaa tu tyá'mua'reej tíjin ti'ij i Círíistu' huatájuuriaca', capu che' i'ríj ti'ij ajtáhua'aj huámuí'nyij. Capu che' i'ríj ti ja'antymué'tin a'ájna i ti a'ájna jin tyí'ijta mej mij huácui'nyij. ¹⁰Ji'nye i Círíistu', ti'ij huamuí', a'yaa pu een jin huamuí' ti'ij jo'puá'ritye'en a'ájci i ti je'ej pua'aj een i maj jin tyúucha'i'ica'aj, ajta ti'ij huatájuuriaca', a'áin pu jin júurij ta'raa ti'ij i Dios jimi séjre'ej. ¹¹A'yaa xu sij cha'taj siana'aj mua'aj tyá'mua'reeriaj sij seríj huácuij a'ájci jimi i ti je'ej pua'aj een, maj sijta júurij i Dios jimi a'ájci jime' sij seríj jitzán ajtyáma'can i Círíistu' ti ajta Jesús pu'éen.

¹²A'áj pu jin, caxu tyi'tá'care'en ti i ti je'ej pua'aj een tyajá'mua'íjtye'ej i ja'mua tzajta', caxu sijta já'astijria'aj a'ájci i ti je'ej pua'aj een i ti ja'mua tzajta' eerányinyii. ¹³Caxu sijta jatuiiria'aj i ja'muatyévíra' a'ájci i ti je'ej pua'aj een, sij sij a'ájci jimi tyí'huíire'ej.

Sulu siata'aj huatóotonyij i Dios jimi, mati'ij tyeétyee maj meríj huácuij majta je'en huatájuuriaca' a'íjci jime' ti a'íin arí jamuáahuíi, siata'aj jaatátuiire'en i jutyévira' siaj sij jaatyáhuíire'en tyi'tíj jime' ti xá'pui' een. ¹⁴A'yaa pu quee che' a'náj tyajamuaata'íjtye'sij a'íjna i ti je'ej pua'aj een, jil'nye caxu ca'nyéjrij jin já'astijre' a'íjci i nyúucarij i maj jin tyí'ijta, sulu a'íj xu jitze aróoca'nyej i ti i Dios juxié'vi'ra' jin tyámua' jamuáaruuj.

Típua'aj ca'nyéjrij jin metyí'huíiria'aj

¹⁵¿Ji'nye tyajamuá'miteeraste' mua'ajmaj? ¿Nyiquij tyooj je'ej pua'aj tyi'tyitacha'íj tá'ju'un a'íjci jime' ti Dios juxié'vi'ra' jin tyámua' tyitatá'caa, tyajta quee che' já'astijria'aj a'íjci i nyúucarij i maj jin tyí'ijta? Catu xaa nyu'uj. ¹⁶Mua'aj xu tyámua' tyá'mua'reej tíjin típua'aj xatóotoonyij a'tíj jimi siaj sij ca'nyéjrij jin ja'rá'astijre'en, mua'aj xu ca'nyéjrij jin jaatyáhuíire'ej. Típua'aj a'yan setyá'astijria'aj a'íjci ti je'ej pua'aj een, a'íi pu jamuaatá'sij siaj sij huácu'nyij, na'ríj típua'aj a'yan setyeetyáhuíire'en a'íjci i ti xá'pui' een, mua'aj xu júurij huatyá'itzeere'ej i Dios jimi. ¹⁷Ajta tyiche' tyaatatyójtzi're'en i Dios ja'mua jime', jil'nye mua'aj mu xu anaquéej ca'nyéjrij jin jahuíiria'ca'aj a'íjci ti je'ej pua'aj een, xu'ríj ja'rá'astej a'íjci i nyúucarij i maj jin tyajamuaamuá'tyej. ¹⁸Ti'ij Dios jamuí'rájtoosiaj sij quee che' ca'nyéjrij jin jatyáhuí'rihua'an a'íjci i ti je'ej pua'aj een, a'yaa pu jamuáaruuj siaj sij jaatyáhuíire'en a'íjci i ti xá'pui' een a'íjci jimi i Dios. ¹⁹(A'yaa nu tyajámua'ixaatye' je'ej ti tyihuá'miteeraste' hua' tzajta' i tyeétyee, jil'nye óoche' pu jamuá'itziitye' siaj sij néijmi'i jo'itéej xá'ra'nyij.) A'yájna siati'ij ará'tyeej tyityaatóo'a' siaj sij jaatyáhuíire'en a'íjci i ti je'ej pua'aj een, siaj sij jéehua huóoxana'cire'en i Dios jimi, a'yaa pu'ij tyúuxie've' siaj a'yan cha'taj siana'aj tyityaatóotoonyij néijmi'i jime' siaj sij jaatyáhuíire'en i ti xá'pui' een, siata'aj sij jil'ré'nye'ej huatyá'itzeere'en i Dios jimi.

²⁰Siati'ij siooj jatyáhuí'rihua'aj a'íjci i ti je'ej pua'aj een, caxu a'íjci jitze tyí'huíiria'ca'aj i ti xá'pui' een i Dios jimi, ²¹¿tyi'tanyí ij jin je'ej tyajamuaatyáhuíi? Ijíj xu sij jutyevi'ra' a'íjci jime' je'ej siaj tyi'tíj huáruuj, jil'nye i ti je'ej pua'aj een, a'yaa pu tyu'tá'caa siaj sij a'íjci jin huácu'nyij. ²²Ajta ijíj, ti'ij Dios jamuí'rájtoosiaj sij quee che' jatyáhuí'rihua'an a'íjci i ti je'ej pua'aj een, xu'ríj sij jahuíire' i Dios. A'íi pu xaa já'muahuíire'en, jil'nye a'íj pu jitze eeráamej i júuricamej ti naa een, i siaj jin júurij xál'ju'un jusén jime'. ²³A'yaa pu tyámue'tin i a'tíj ti huámui'nyij típua'aj jaatyáhuíire'en a'íjci ti je'ej pua'aj een, ajta i ti Dios juxié'vi'ra' jin tyámua' tyitaatá', a'íi pu taatá'sij tyej tyij júurij huatyá'itzeere'en a'íjci jamuán i Círíistu' ti ajta Jesús pué'een, i tavástará'.

Je'ej ti huatóomua'aj tipua'aj i maj tyóovi'tin

7 ¹Nye'ihuáamua', mua'aj xu jamua'tyej i yu'xarij i maj jin tyí'ijta, a'yaa xu siajta tyá'mua'reej ti i nyúucarij a'yan tyé'ijtye' ti'ij ooj júurij i a'tíj. ²Ajta a'yájna tipua'aj íiti' huicha'aj, a'yaa pu tyé'ijtye' a'ájna i nyúucarij ti a'yan tyúuxie've' ti i íiti' huatyá'ítzeere'en i jucín jamuán ti'ij ooj júurij, ajta tipua'aj i cína'ra'an arí huámu'i'nyij, capu che' a'yan tye'íitye'ej ja'mej i nyúucarij. ³A'íj pu jin, tipua'aj séej jamuán huatyéviche'en, ti'ij ooj júurij i cína'ra'an, juxana'cire' a'ájna i íiti', ajta tipua'aj i cína'ra'an arí huámu'i'nyij, a'ájna i nyúucarij capu che' tye'íitye'ej ta'mej, aj pu'ij i'rítaj ja'mej ti séej tyáataj jamuán huatyéviche'en.

⁴Siajta mua'aj, nye'ihuáamua', siati'ij jitzán ajtyáhuixij i Ciríistu' aj xu sij siajta jamuán huácuij a'ájci jimi i nyúucarij i maj jin tyí'ijta, a'íj xu jin mua'aj séej jitze ajtyáma'can, a'íi pu a'ín pué'een i ti huamuí' ajta je'ej huatájuuriaca'. A'íj pu jin i'ríj tyej jaatátuiire'en i Dios i tyaj jin xá'pui' huaríj. ⁵Ji'nye tyati'ij a'yan tyí'tyechajca'aj mati'ij i maj je'ej pua'aj tyityetyúucha'íj, a'ájna i nyúucarij i maj jin tyí'ijta, a'yaa pu tyitaatyáhuíi tyej tyij jáamua'reej tyaj quee xá'pui' rijcaa, a'íj tutyij huamue'tíj tyej tyij huácui'nyij. ⁶Ajta ijíj tyaj tyeríj huácuij a'ájci jimi i nyúucarij ti néijmi'i jin tyí'ta'íjtya'ca'aj, tu'ríj taxáahuaj séejre' tyej tyij jaatyáhuíire'en i Dios a'ájci jime' i júuricamej ti jájcuaj, catu che' a'ájci jimi i nyúucarij ti mí'ma'can.

A'ájna i ti je'ej pua'aj een ti nye jitze séejre'

⁷¿Nyij a'yan tyetyu'taxájtaj ti i nyúucarij i maj jin tyí'ijta je'ej pua'aj een? Catu xaa nyu'uj, ji'nye canu a'yan tya'mua'rériajche' tyi'tíj ti je'ej pua'aj een tipua'aj quee huatyá'ítzeere'nyijche' ityájma jimi a'ájna i nyúucarij i maj jin tyí'ijta. Canu a'náj jamua'rériajche' ti je'ej pua'aj een tipua'aj nyetyí'nyacua'tzaj, tipua'aj quee a'yan tyinaaté'exaatye'nyijche' a'ájna i nyúucarij yee: “Capáj tyí'nyacua'tzaj.” ⁸Ajta a'ájna i ti je'ej pua'aj een a'íj pu jitze huóoca'an, ti'ij nye jitze jaatyátoonyij néijmi'i i ti je'ej pua'aj een. Ji'nye tipua'aj quee séejre'ej i nyúucarij i maj jin tyí'ijta, capu i'ríj tyaj jáamua'reej tyi'tíj ti je'ej pua'aj een. ⁹Ajta jájcuaj imuáj, nyaxáahuaj nu jo'chá'canya'aj, canu tyi'tíj mua'reeriaca'aj, ajta nyati'ij jáamua'reeri' a'ájci i nyúucarij i maj jin tyí'ijta, aj pu'ij jéetze' huataséjre nye jimi a'ájna i ti je'ej pua'aj een, aj nu nyij huamuí'. ¹⁰Ajta a'ájna i nyúucarij ti tyámua' tyinaatá'nyijche' nyej nyij júurij ná'ra'nyij, a'yaa pu tyino'xíjtyej nyej nyij huámu'i'nyij, ¹¹ji'nye a'ájna i ti je'ej pua'aj een a'íi pu náacuanamuaj nyej nyij quee ja'rá'astej a'ájci i nyúucarij, a'íj pu'ij jin i nyúucarij no'xíjtyej nyej nyij huámu'i'nyij.

¹² A'íj pu jin tyámua' een a'íjna i nyúucarij i maj jin tyí'ijta, ajta quee tyi'tíj ja'itziitye', néijmi'i pu xá'pui' een. ¹³ Ajta ji'nye na'quij, ¿nyiquij a'íjna i ti xá'pui' een no'xíjtyej nyej nyij huámui'nyij? Capu xaa nyu'uj. A'yaa pu tyúuxie'va'ca'aj ti huataséjre'en i ti je'ej pua'aj een, a'íj pu jin a'íjna i ti xá'pui' een no'xíjtyej nyej nyij a'íjci jin huámui'nyij, tí'ij ajta séeria'aj já'ra'nyij ti jéehua huápui'ij je'ej pua'aj huasé'rin i Dios jimi a'íjna i ti je'ej pua'aj een.

¹⁴ A'yaa tu tyá'mua'reej ti i nyúucarij a'íjna jitze ma'can i júuricama'ra' i Dios, nyajta nyáaj canu uhuájca'nyej, néijmi'i nu jin jahui're' a'íjci i ti je'ej pua'aj een. ¹⁵ Canu yó'itej je'ej nyaj een jime' jin a'yan tyi'tyínyecha'íj, ji'nye canu a'yan ricij je'ej nyaj tyá'xie've', ajta a'íjna i tiquee na'ránajchij, a'yaa nu a'íjci jin ricij. ¹⁶ Ajta tipua'aj a'yan nyarijca a'íjci jime' i tiquee na'ránajchij, aj nu nyij a'yan tyá'mua'reeren ti xá'pui' een a'íjna i nyúucarij i maj jin tyí'ijta. ¹⁷ A'íj nu jin quee che' nyáaj a'íin pué'een i ti a'yan ricij, sulu a'íjna i ti je'ej pua'aj een i ti ú'sejre' yunyatzájta'. ¹⁸ Ji'nye a'yaa nu tyá'mua'reej yunyatzájta', i nyahue'ra' jitze tiquee uhuájca'nyej, tiquee ú'sejre' i ti xá'pui' een, tyij nyajta a'yan tyá'xie've' nyaj a'yan huárinyij a'íjci jime' i ti xá'pui', canu pújoorej nyaj a'yan huárinyij. ¹⁹ Canu a'íjci jin a'yan ricij i ti xá'pui' i ti na'ránajchij nyej nyij a'yan huárinyij, sulu a'íj nu jin je'ej pua'aj ricij i tiquee na'ránajchij. ²⁰ Arí ijíij, tipua'aj a'yan nyarijca a'íjci jime' je'ej tiquee tyina'ránajchi, canu che' nyáaj a'íin pué'een i nyaj a'yan ricij, sulu a'íjna i ti je'ej pua'aj een ti ú'sejre' yunyatzájta'.

²¹ A'yaa pu'ij tyé'miteere' nyaj jaxie've' nyaj xá'pui' huárinyij, ajta canu pújoorej, ji'nye nye jitze pu séejre' a'íjna i ti je'ej pua'aj een. ²² I nyaxiéjnyu'caa nu jin jaxie've' nyaj ja'rá'astee a'íjci i Dios nyuuccaaj, ²³ a'íi pu nyo'se' a'íjna i ti je'ej pua'aj een a'íjci jamuán i ti tyí'ijta yu nyaxiéjnyu'caa tzajta'. A'íi pu a'íin pué'een i ti je'ej pua'aj een i ti tyí'ijta nyej jitze ti ajta arí naatyáaji'quej.

²⁴ Canu nyij che' je'ej tyéejtyoovej. ¿A'tanyíj ni'rátosij a'íjna jitze i nyaj jatyáhue'ra' tí'ij quee a'yan tyináaci'tyij nyaj huámui'nyij? ²⁵ A'íi pu'uj i Dios, i nyaj tyé'tyojtzi're', a'íjci jitze ma'can je'ej ti huaríj a'íjna i Jesús, i Ciriístu' ti ajta tavástara' pué'een. A'yaa nu nyij tyiyó'itej nyej jaatyáhui're'en je'ej ti tyeetyájtoo a'íjna i Dios i junyúucca, nyajta quee nyaca'nyej a'íj nu nyij jin putya'hui're' a'íjci i ti je'ej pua'aj een.

Tyej tyámua' tyi'tyítacha'íij je'ej ti tyá'xie've' i júuricama'ra' i Dios

8 ¹ A'yaa pu'uj, capu che' tyi'tíj je'ej huá'uurej a'íjma i maj jitzán ajtyu'uj i Ciriístu', ti ajta Jesús pué'een, ² ji'nye a'íjna i nyúucaria'ra' i júuricama'ra' i Dios, i ti ajta tyu'tá'caa tyej tyij júurij

tá'ra'nyij a'fjci jimi i Ciríistu', a'fí pu mui'rájtoo a'fjci jitze i ti je'ej pua'aj een ti ajta tyu'ljé'caj. ³Ji'nye i Dios pu a'yan huarj je'ej tiquee tyu'tái'riitariaca' ti a'yan huárinyij ityájma jimi a'fjna i nyúucarij i maj jin tyí'ijta Moisés ti jaatyájttoo, capu táahuíi a'fjna i nyúucarij a'fjci jime' tyaj quee ja'viicue'racaj tyaj ja'rá'astej. A'fj pu jin Dios muyo'ta'ítyaca' i juyó'j tí'ij a'fín a'yan cha'tána'aj huataséjre'en matí'ij i tyétyacaa i maj je'ej pua'aj tyityetyúucha'ij i Dios jimi, tí'ij huatóomu'vejritaj a'fijma jitze ma'can i maj ootyá'ítzee i Dios jimi, a'yaa pu a'fjna jin huarj tí'ij jo'xíjtye'en tí'ij quee che' tyi'ta'íitya'aj já'ra'nyij a'fjna i ti je'ej pua'aj een. ⁴A'fí pu a'yan huarj tyej tyij ityáj ja'rá'astijre'en je'ej ti tyúuxie've' a'fjci jitze i nyúucarij, ji'nye catu che' a'yan tyi'tyítacha'ij a'fjci jime' i ti je'ej pua'aj een ti eerányinyii i tatzájta', sulu a'fj tu jitze arátaca'nyej i júuricama'ra' i Dios.

⁵A'fímaj i maj a'yan tyityetyúucha'ij a'fjci jime' ti je'ej pua'aj een ti eerányinyii i hua' tzajta', a'yaa mu a'fjci jitze tyí'mua'tzej je'ej ti a'fín ca'nyíjra'aj tyihua'tá'caa, majta a'fímaj i maj a'fjci jitze aróoca'nyej i júuricama'ra' i Dios, a'yaa mu a'fjci jin tyá'huoo je'ej ti tyá'xie've' a'fjna i júuricama'ra' i Dios. ⁶Tipua'aj a'tfj a'fjci jitze tyí'mua'ajcaj i ti je'ej pua'aj een ti tzajta' eerányinyii, a'yaa pu tyá'ci'tyij tí'ij huámuí'nyij, ajta tipua'aj a'tfj a'fjci jitze tyí'mua'ajcaa je'ej ti tyá'xie've' a'fjna i júuricama'ra' i Dios, a'fí pu júurij huatyá'ítzeere'ej ajta tyámua' tyí'ényee'ej ja'mej a'fjci jimi. ⁷Majta a'fímaj i maj a'fjci jitze tyí'mua'tzej i ti je'ej pua'aj een, a'fí mu jájcha'íire' i Dios, ji'nye camu jaxie've' majta quee pújoorej maj ja'rá'astej i nyúucaria'ra' i Dios. ⁸A'fj pu jin a'fímaj i maj a'yan tyá'astijre' a'fjci ti je'ej pua'aj een ti hua' tzajta' eerányinyii, capu je'ej tyí'í'rij maj tyámua' tyaatá'an i Dios.

⁹Siajta mua'aj caxu che' a'yan tyí'tyechej tí'ij i ti je'ej pua'aj een, sulu je'ej ti tyúuxie've' i júuricama'ra' jimi i Dios, ji'nye a'fí pu'ríj huatyá'ítzee ja'mua jimi. Dios pu ja'mua tzajta' séejre'. Ajta a'fjna i tiquee jimi séejre' i júuricama'ra' i Ciríistu', capu Ciríistu' jitze ajtyáma'can. ¹⁰Ajta tipua'aj i Ciríistu' ja'mua tzajta' séejre'ej, a'fí pu ajta ja'mua tzajta' séejre' i júuricamej, ji'nye Dios pu arí tyámua' jamuáaruuj, tyij ajta arí i ja'muatyé'vira' huamuí' a'fjci jitze i ti je'ej pua'aj een. ¹¹Ajta tipua'aj ja'mua tzajta' séejre'ej i júuricama'ra' i Dios ti jaatájuurityej a'fjci i Ciríistu', a'fí pu ajta jaatájuuritye'sij i siaj jatyáhue'ra' a'fjci jime' ti i júuricama'ra' arí ja'mua tzajta' séejre'.

¹²A'fj pu jin nye'ihuáamua' a'yan tyúuxie've' ityájma jimi tyej tyij quee che' a'yan tyá'astijre'ej a'fjci ti je'ej pua'aj een i ti tatzájta' eerányinyii. ¹³Ji'nye tipua'aj a'yan setyityetyúucha'íij a'fjci jime' i ti je'ej pua'aj een i ti eerányinyii ja'mua tzajta', a'yaa pu tyajá'muaci'tyij siaj huácuí'nyij, ajta tipua'aj sequée che' já'astijria'aj a'fjci i ti je'ej

pua'aj een ti eerányinyii i ja'mua tzajta', siajta je'en a'fjci jitze aróoca'nyej i júuricama'ra' i Dios, aj xu júurij xá'ju'un.

¹⁴Néijmi'i i maj jitzán aróoca'nyej i júuricama'ra' i Dios, a'fí mu yójmua'mua' pué'een i Dios. ¹⁵Siajta mua'aj caxu a'fjna ancuriáa' i júuricamej ti'ij ca'nyéjrij jin tyajamuata'fjtye'en siaj sij siajta jatziinya'aj a'fjci i ti tyajá'mua'ijtye', sulu a'fí pu a'fín pué'een i júuricama'ra' i ti a'yan já'mua'uuerej siaj sij yójmua'mua' pue'éenye'ej xá'ra'nyij i Dios. A'fj tu júuricama'ra' jitze arataca'nyáaj tyij a'yan tyé'jee tijin: “Muáaj paj tavástara' pué'een.” ¹⁶Ajta a'fjna i júuricama'ra' i Dios, ajta i tajúuricamej, a'yaa mu cha'taj mana'aj tyá'mua'reej tyaj yójmua'mua' pué'een i Dios. ¹⁷Ajta tyaj tyeríj yójmua'mua' pué'een i Dios, tyi'tfj pu a'fjci jin ajta taci'tyij i Dios jimi jamuán i Ciríistu', jil'nye ityáj tu tyajta jamuán jajpuéjtzij i Ciríistu' tyajta tutyij jamuán séeria'aj tá'ju'un jusén jime'.

A'fjna ti huápu'i'ij naa huasé'rihua'aj ta'mej ti ooj maja've'mej

¹⁸A'yaa pu tyiná'miteeraste' nyéetzij, a'fjna i tyaj jin jajpuéjtzij íiyan i cháanacaj japua, capu tyi'tfj je'ej a'fjci jimi i tyaj jimi séeria'aj tá'ju'un ti'ij huataséjre'en i tavástara'. ¹⁹Ajta ti'ij na'aj i ti a'yan tyí'sejre' i Dios ti tyú'taahuaca', a'fí mu jajchó've' a'ájna xicáara' ti'ij i Dios huatóosejrata ityájma jimi i tyaj yójmua'mua' pué'een. ²⁰Jil'nye néijmi'i ti'ij na'aj tyí'sejre' seequéj pu tyi'huó'ruu ti'ij quee a'yan éenye'ej tá'ra'nyij je'ej ti tyá'xie'va'ca'aj i Dios, capu jusíj a'yan huóruuj, sulu Dios pu juxié'vi'ra' jin a'yan tyeetyájtoo ti'ij jaajácuare'en majca'huáyee, ²¹néijmi'i i ti tyí'sejre' pu tyi'ijchó've' a'ájna xicáara' ti jitzán Dios jaatyáhuire'ej, ti'ij ajta tajamuán séeria'aj já'ra'nyij i tyaj yójmua'mua' pué'een. ²²A'yaa tu tyá'mua'reej ti a'yan tyí'een jo'tij na'aj i cháanacaj japua ti a'yan tyu'puéjtzij ti'ij tipua'aj íitaj ootacu'nyej. ²³Tyajta ityáj a'yaa tu tyajta tya'ajpuéetzij, jil'nye pu'ríj ityájma jimi séejre' i júuricama'ra' i Dios, ti a'fín pué'een i ta'nájcaj ti Dios a'yan tyita'táratziiri'. Jéehua tu jajpuéetzij a'yan tyetye'ejcho've'ej ti'ij táaci'tyij tyaj yójmua'mua' pué'eenye'ej tá'ra'nyij i Dios, ti'ij ajta i Dios japuan huatányuunyij i tatyévira'. ²⁴A'yaa pu een jin Dios tii'rájtoo tyej a'yan tye'ejchó've'ej a'fjci i tyaj quee xu jaséj. Ajta tipua'aj tyeríj jaséjraj i tyaj jajchó've', capu che' juxie've' tyaj jacho'va'aj. ¿Nyi a'tfj tyi'tfj tyicho've' ti arí jaaséj? ²⁵Ajta tipua'aj i tyaj jajchó've' tyequéé xu jaséjraj, a'yaa pu tyúuxie've' tyaj jacho'va'aj tyequéé tyá'xaahuataj.

²⁶A'yaa pu'ij ajta i júuricama'ra' i Dios tyí'tahuiire' a'fjci jime' tyaj quee je'ej rinyij tajfímua'aj. Jil'nye catu jamua'reej tyi'tfj ti nyúucarira' juxie've' tyej tyij huatyényuunyij, a'fj pu jin i júuricama'ra' i Dios tajitzé ma'can tyényuusij, a'yaa pu tyó'ci'xij

tí'ij i tiquee tya'ancurí'í'rej, jí'nye capu í'ríj ti a'tíj jaataxáj.

²⁷Ajta a'íjna i Dios ti néijmi'i mua'reej je'ej tyaj tyí'mua'tzej i tatzájta', a'íi pu jamua'reej je'ej ti huatóomua'aj a'íjna i ti jahuoo i júuricama'ra', jí'nye a'íi pu hua' japua huatányuusij je'ej ti i Dios tyá'xie've'.

Néijmi'i tu jin tyu'tyámue'tíj i Dios jimi

²⁸A'yaa tu tyá'mua'reej ti Dios huá'huíire' tí'ij néijmi'i a'yan tye'rájra'nyij je'ej ti a'íin tyámua' tyihuotá'an a'íijma i maj jaxie've', a'íijma i ti arí a'íin hua'antyíhuoj tí'ij tyi'tíj jin tyihua'antyárujtye'en.

²⁹Ajta a'íijma i ti Dios jájcuaj ímuáj arí huá'muajtyajca'aj, a'yaa pu tyihua'antyíhuoo tí'ij a'yan huó'uurej tí'ij a'íjna i yójra', ajta tí'ij a'íin pue'éenye'ej tá'ra'nyij i ta'nájcaj a'íijma jimi i ihuáamua'mua'. ³⁰Ajta a'íijma i ti a'yan jájcuaj ímuáj tyihua'antyíhuoo, a'íi pu ajta huo'tajé, ajta a'íijma i ti huo'tajé, a'íi pu tyámua' huó'ruuj mej mij jí'réenya'aj huatyá'ítzeere'en a'íjci jimi, ajta a'íijma i ti tyámua' huó'ruuj, a'íi pu huo'ta' mej mij jamuán séjre'ej muá'ra'nyij jusén jime'.

³¹¿Jí'nye tyajtáhua'aj tyu'taxájta? Típua'aj i Dios tajapúa nyuuccaaj, capu í'ríj ti a'tíj ta'antypuá'ritye'en ityájma. ³²Capu i Dios quee a'yan tyito'tyéchootzej i juyó, sulu a'íi pu tyu'tá' tí'ij huámuí'nyij tajitzé ma'can i cúruuj jitze, ¿nyiquee a'yan cha'taj na'aj ij juxié'vi'ra' jin néijmi'i tyitaatapuéjve'sij, i ti tyí'sejre' i Círíistu' jimi?

³³¿A'tanyíj a'yan tyihuá'xajtzi' a'íijma i Dios ti hua'antyíhuoj? Dios pu a'íin pu'éen i ti tyámua' huá'uurej. ³⁴¿A'tanyíj puéjtzij huo'tá'sij? A'íi pu a'íin pu'éen i Círíistu' ti huamuí', ajta je'en huatájuuriaca', íjij pu muáca'ta' i Dios já'sejre', a'íi pu'ij taatyáhuíire'ej. ³⁵¿A'tanyíj ij tye'entyí'uunaj tí'ij i Círíistu' quee che' taxie've'ej? ¿Nyiquij típua'aj tyi'tíj tamuarie'riste'ej, na'ríij tyi'tíj ta'itziitya'aj, ca' típua'aj je'ej pua'aj máta'uuriaj, nusu tyatájcuaj, ca' típua'aj tyej quee je'ej tyéejviicue'raj, ca' típua'aj tyaj huácuí'nyij? ³⁶A'yaa pu tyé'yu'si' i yu'xarij jitze tíjin:

Muéetzij jime' tu a'náj tina'aj á'taca'nyej tyej tyij huácuí'nyij, a'yaa mu ta'uurej matí'ij a'íimaj i cánya'xii i maj huá'cuí'caa.

³⁷Ajta néijmi'i jime' a'íjci, a'yaa tu tyu'tyámue'tíj a'íjci jime' ti i Círíistu' taaxié'vej. ³⁸A'yaa nu tyámua' tyá'mua'reej tiquee tyi'tíj tye'entyí'uunaj tí'ij quee che' i Dios taxie've'ej. Capu i tyaj júurij huatyá'ítzeere'en, na'ríij tyaj huácuí'nyij, na'ríij i maj tajapúa tyí'huíire' i Dios jimi, na'ríij a'íimaj i maj tyí'huíire' i tyiyáaru' jimi, je'ej ti tyí'ricij i ti tyí'sejre', nusu je'ej ti tyí'rinyij, ³⁹típua'aj i ti jéetze' ájtyeej, na'ríij i ti jéetze' ajo'cátjee i tajityé, tyi'tíj tina'aj ti a'yan séejre' i Dios ti tyú'taahuaca'. Capu tyi'tíj tye'entyí'uunaj i Dios ti jin taxie've' ajta taataséjratyej i Círíistu' jimi, a'íjna i Jesús ti tavástará' pu'éen.

Dios pu hua'antyíhuoj a'íjima i maj Israel jitze ajtyáma'can

9 ¹A'yaa nu tzáahuatyí'ra'aj jin tyajá'mua'ixaatye' i Ciriístu' jimi, canu tyí'hue'taj. Ajta i nyaj jin ma'úumua'rej jamuán i júuricama'ra' i Dios, a'yaa mu tyí'nye'ixaatye' ti a'yan tyi'ja'yájna, ²jéehua nu nyaxaamujritye', nyajta a'náj tina'aj jajpuéjtzij i nyaxiéjnyu'caa tzajta', ³a'yaa nu tyá'xie've' tipua'aj i'riitan na'ránajchij ti Ciriístu' manúurieenyij, ti'ij na'antypuá'ritye'en hua' jitze ma'can i nye'ihuáamua', a'íjima i maj a'yan cha'taj mana'aj tyitye'ráanyej nyati'ij nyáaj. ⁴A'íi mu Israel jitze ajtyáma'can, ajta i Dios huatyóoyojmua'tyej. Dios pu ajta huatyá'ítzee hua' jimi a'íjna ti naa séeria'aj ta'raa, ajta hua' jimi tyu'tá' i junyúucaa je'ej ti tya'ra'nyíche', majta a'íimaj, a'yaa mu tya'ancuriáa' a'íjci i nyúucarij i maj jin tyí'ijta, majta a'íjci i yi'ráj je'ej maj tyá'na'michej, ajta mui'caa jin tyihua'táratziiri'. ⁵A'íi mu majta hua' jitze eeráma'can i tahuásimua'ci'ij, ajta hua' jitze pu a'yan tye'ráanyej a'íjna i Ciriístu' ti ajta a'íin pu'éen i Dios i ti néijmi'i jin antyúumua'reej, tyiche' a'náj tina'aj tyé'tyojtzi're'ej. Che' a'yan tyá'ra'nyij.

⁶Canu a'yan tyajá'mua'ixaatye' ti i nyúucarij quee tyi'táj huiiria'ca'aj i Dios ti huo'ta' a'íjima i maj Israel jitze ajtyáma'can, sulu a'íimaj i maj a'íjci jitze eeráanyej i Israel, camu néijmi'i ji'r'é'can jime' a'íjci jitze ajtyáma'can. ⁷Camu majta néijmi'i yójmua'mua' pu'éen a'íjci i Abraham, sulu Dios pu a'yan tyaaté'exaatya'ca'aj tijin: “A'íi mu a'íin pu'éeenye'ej muá'ju'un a'yóojmua' i maj jitzán eerányesij a'íjci i Isaac.” ⁸A'yaa pu'ij tyí'ta'ixaatye' maj quee néijmi'i yójmua'mua' pu'éen i Dios i maj Abraham jitze eeráanyej, sulu a'íimaj i maj ja'tzaahuatye' a'íjci i ti jin Dios tya'tóoratziiri', a'íi mu a'íin pu'éen i maj yójmua'mua' pu'éen a'íjci i Abraham. ⁹Ji'nye Dios pu a'yan tya'tóoratziiri' a'íjci jimi i Abraham tijin: “A'náj nyaj nyeríj a'yan tyaaxá'pui'intarej, nyáaj nu nyajtáhua'aj ya'uvé'nyesij, ajta i Sara pu arí tyiyóoj ta'mej.”

¹⁰Ajta quee a'íi na'aj. A'íimaj i maj hua'puaj i yójmua'mua' i Rebeca, a'íi pu a'íin pu'éeenye'ej i hua' táataj a'íjna i Isaac, ¹¹Ajta mati'ij quee xu nánie'huacaj i maj hua'puaj, mati'ij quee xu tyi'táj je'ej uuriáacaj, tipua'aj ti xá'pui' een, na'ríij ti je'ej pua'aj een, a'yaa pu Dios tyaaté'exaa a'íjci i hua' náanaj tijin: “A'íjna ti vásti', a'íi pu jaatyáhuire'ej a'íjci i ti pá'ri'ij.” ¹²⁻¹³Ajta a'yan tijin: “Nyáaj nu jaxie've' a'íjci Jacob, nyajta jájcha'iire' a'íjci i Esaú.” A'yaa pu'ij tyé'miteere' je'ej ti ricij i Dios ti'ij a'íin séej avá'huoonyij, je'ej ti a'íin tyá'xie've', ajta quee a'yan tyaataxáatan je'ej ti tyi'táj jin huaríj.

¹⁴¿Nyij a'íjci jin a'yan tyetyu'taxájtaj ti i Dios quee xá'pui' ricij? Catu xaa nyu'uj. ¹⁵Ji'nye Dios pu a'yan tyaaté'exaa a'íjci i Moisés tijin: “Nyáaj nu tyaatú'uunyi'raj a'táj tina'aj ti a'yan tyina'ránajchi, nyajta nu ja'ancu'vaxi'ij a'táj ti ajta a'yan tyina'ránajchi.” ¹⁶A'yaa pu'ij, capu

a'yan tyá'ci'tyij i a'táj a'fjci jime' je'ej ti jusíj tyá'xie've', nusu je'ej ti tyí'táj jin tyí'tyese', sulu je'ej ti i Dios tyá'ancu'vaxi'ij. ¹⁷Ji'nye a'yaa pu tyé'yu'si' i yu'xarij jitze ti i Dios a'yan tyaaté'exaa a'fjci i rey Egipto ti tyejé'ijtacaj tijin: “A'yaa nu rey jime' tyimua'antyáaruajtje nyej nyij a' jimi huo'taséjratye'en i nyaj jin néijmi'i putyí'uurej, ajta mej mij néijmi'que' náamua'tyij ínyan i cháanacaj japua.” ¹⁸A'yaa pu'ij i Dios tyá'cu'vej a'táj ti a'yan tya'ránajchi, ajta a'yan tya'tá'caa ti a'táj a'yan tye'tyánaamuan i juxiéjnyu'caa a'táj ti ajta a'yan tya'ránajchi.

¹⁹Ajta a'táj pu a'yan tyu'taxájtaj tijin: “Tipua'aj a'yan tyil'ja'yánatan, ¿ji'nye een jime' i Dios tajitzé tyí'pua'ritye', tipua'aj a'fjin jusíj a'yan ta'uurej?” ²⁰¡Pajta muáj tyáati! ¿A'tanyíj paj pué'een pej pij a'yan tyí'anyuuste' i Dios jimi? ¿Nyiquij i xá'rij a'yan tyaaté'exaatyé'sij a'fjci i ti jaatyátaahuaca' yee: “Ji'nye een jime' a'yan petyinatyátaahuaca'?” ²¹A'fjna i a'táj ti xá'rij tyí'ta'huaca, a'yaa pu tyu'tóoci'puaj ti tyu'muárie'en i xarij jime', t'ij séecan tyú'taahuaj i xá'rijtze ti naa tyu'sé'rin, ajta séecan ti cha'na'aj tina'aj tyí'huiire'.

²²Dios pu a'yan tyá'xie've' ti taataséjratye'en ti a'fjin néijmi'i putyí'uurej, a'fj pu jin néijmi'i tyo'táviicue'ri' a'fjma jimi i ti a'yan tyihua'tyévijtya'ca'aj mej mij jó'vetyij. ²³A'yaa pu'ij ajta ityájma tyitaataséjra ti a'fjin tyámua' tyihuo'tyájttoo a'fjma i ti hua'ancu'vajxi, ajta anaquéj tyámua' táaruuj tyej tyij hua' jitze ajtyáma'cantaj tá'ra'nyij. ²⁴A'yaa pu i Dios tyitaatajé, ityájma i tyaj Israel jitze ajtyáma'can, ajta a'fjma i maj séej chuéj japua já'ma'can. ²⁵A'yaa pu ajta tyo'tyéyu'xaca' i yu'xarij jitze a'fjna i Oseas tijin:

A'fimaj i maj quee nyejitzé ajtyáma'cantaca'aj,
a'yaa nu huo'támua'sij tijin mu'ríj nyetyeé'ityeristyamua' pué'een,
nyajta a'fjma i nyaj quee hua'xie'va'ca'aj,
a'yaa nu nyajta tyihuo'taxájtaca' tijin nyaj hua'xie've'.

²⁶Ajta jo'maj a'yan tyihuojo'té'exaa i tyeé'yyee yee:

“Mua'aj xu quee nyetyeé'ityeristyamua' pué'een”,

a'yaa mu tyihuo'taxájtaj maj yójmua'mua' pué'een i Dios ti júurij.

²⁷Ajta a'fjma i maj Israel jitze ajtyáma'can, Isaías pu a'yan tyihuo'té'exaaaj tijin: “Tyij majta jéehua i maj Israel jitze ajtyáma'can, a'yan a'chu t'ij i séj ti a'áa ja'ajtyájcay jo'tij ja'va'ástimee i jájrij, capu néijmi'caa huiire'en t'ij i Dios hua' japua huatányuunyij, ²⁸ji'nye jiyé'tzín pu i Dios néijmi'i antyipuá'ritye'sij t'ij puéjtzij huo'tá'an a'fjma i maj a'yan huacháatimee i cháanacaj japua.” ²⁹A'yájna t'ij ajta arí tyu'taxájtaca' a'fjna i Isaías tijin:

Tipua'aj i Dios ti néijmi'i jin antyúumua'reej quee taatá'nyijche',
tyej tyij séecan jitze eerama'cántaj, a'yaa pu'ij ajta
tyí'ta'uréenyijche',
t'ij tyihuo'ruuj i maj a'áa jo'cháatima'caa a Sodoma majta a
Gomorra.

I maj jin ootyá'itzee i maj Israel jitze ajtyáma'can

³⁰ ¿Ji'nye tyetyu'taxájtaj a'íjna jime'? Nyiquij a'íjna jime' i tyaj jin tyá'tzaahuatye', i Dios tyámua' huó'ruuj i maj quee tyá'tzaahuatye', i maj majta jahuooca'aj mej mij ji'r'é'nye'ej huatyá'itzeere'en i Dios jimi. ³¹ Majta a'íimaj i maj Israel jitze ajtyáma'cantaca'aj, i maj a'yan tyá'huooca'aj i nyúucarij jitze i maj jin tyí'ijta mej mij ji'r'é'nye'ej huatyá'itzeere'en i Dios jimi, a'íi mu quee ja'ancuriáa' i maj jahuooca'aj. ³² ¿Ji'nye een jime' mequee ja'ancuriáa'? A'yaa mu een jin huamué'tichej maj quee a'íjna jitze tyi'ca'nyajca'aj i maj jitzán tyá'tzaahuatye', sulu je'ej maj tyi'tíj jin rijcaa. ³³ A'íj mu jin huamué'tichej a'íjci jime' maj jaatyáxaahuataca' a'íjci i ti a'yan tyé'yu'si' i yu'xarij jitze tíjin:

Nyáaj séej tyéviy huata'ítyij a Sión,

a'yaa pu tyinaatyáhuire'ej tí'ij i tyetyéj i maj jitzán éjcataj i tyétyacaa,

ajta i ti jitzán tyí'ca'nyej capu jaatatyévi'raste'sij.

10 ¹ Nye'ihuáamua', a'yaa nu tyá'xie've' i nyaxiéjnyu'caa tzajta', najta a'yan tyá'huavij i Dios tí'ij a'íin hue'rátóonyij i maj Israel jitze ajtyáma'can. ² A'yaa nu tyámua' tyá'mua'reej sij jéehua jaxie've' sij jaatyáhuire'en i Dios, ajta a'íjna i sij jin jaxie've' sij sij a'yan huárinyij capu a'íjna jitze aróoca'nyej i ti ji'r'é'can jime'. ³ Ji'nye caxu jamua'reej ti i Dios a'íin pué'een i ti tyámua' huá'uurej i tyeítyee, jujíimua'aj xu sij a'yan tyá'huo sij sij ji'r'é'nye'ej huatyá'itzeere'en, sijta quee a'yan ricij je'ej ti i Dios tyaaxá'pui'intarej tí'ij a'tíj ji'r'énya'aj jimi huatyá'itzeere'en a'íjci jimi. ⁴ Ajta a'íjna i nyúucarij i maj jin tyí'ijta a'íi pu antyipuá'riaca' tí'ij i Ciriístu' yan uvé'nyej, a'yaa pulij tyí'rij sij néijmi'i tyámua' tyityeetyá'itzeere'en a'íjci jime' sij tyá'antzaahuatye'en i Ciriístu' jimi.

⁵ Ajta tí'ij a'tíj tyámua' tyu'tyá'itzeere'en a'íjna jitze ma'can i nyúucarij i maj jin tyí'ijta, Moisés pu a'yan tyo'tyéyu'xaca' tíjin: “A'tíj ti ja'rá'astijre'en a'íjci i nyúucarij i maj jin tyí'ijta, a'yaa pu tyúuxie've' ti néijmi'i a'íjci jitze aróoca'nyej i nyúucarij.” ⁶ Ajta i ti jin a'tíj tyámua' tyu'tyá'itzeere'en a'íjna jimi i maj jitzán tyá'tzaahuatye', a'yaa pu tyá'xaj tíjin: “Capáj a'yan tyí'mua'ajcaj mua' tzajta' yee: ¿A'tanyíj tajapuá jo'ojnyésij?, ta'aj ij yajava'cányijtye'en a'íjci i Ciriístu'”, ⁷ na'ríij yee; ¿ajo'cárutyij tyétye' imuáaj?, ta'aj ij je'tátoonyij i Ciriístu' hua' tzajta' i maj meríj huácuij.” ⁸ Tyi'tanyí na'aj putyí'xaj i ti a'yan yee: “A'íjna i nyúucarij a jimi pu séejre', ajta a'íjci jitze i paj jin ma'úumua'rej ajta a'xiéjnyu'caa tzajta'.” A'íi pu a'íin pué'een i nyúucarij tyaj jitzán tyá'tzaahuatye' tyajta huá'ixaatye'. ⁹ Tipua'aj a'yan petyu'taxáj yee Jesús pu tavástará' pué'een, pajta

a'xiéjnyu'caa tzajta' tyá'antzaahuatye'en ti i Dios jaatájuuritej, aj pu i Dios mui'rátoosij. ¹⁰ A'yaa pu tyúuxie've' paj a'xiéjnyu'caa jin tyá'antzaahuatye'en ti'ij muáahuiire'en, pajta mua' tyenyij jin jaataxáj ti i Jesús a'fin pué'een i Ciríistu', aj pu'ij Dios a japua huatányuusij.

¹¹ A'yaa pu tyé'yu'si' i yu'xarij jitze tijin: “A'táj ti tyá'tzaahuatye' i Ciríistu' jimi, capu a'náj huatóotyevi'ra'astaj.” ¹² Majta juxa'aj mana'aj een i tavástara' jimi, a'fímaj i maj Israel jitze ajtyáma'can, majta i maj séej chuéj japua já'ma'can, ji'nye síj pu'uj a'fin pué'een i ti néijmi'caa tavástara', ajta néijmi'i tyihua'tá'caa jelej ti síj ajta síj tyaatáhuaviiraj. ¹³ Ji'nye a'yaa pu tyé'yu'si' tijin: “A'táj tina'aj ti a'yan tyaatáhuoosij i tavástara' jimi, Dios pu japuan huatányuusij.” ¹⁴ Ajta ¿ji'nye tyí'rij maj huatyényuunyij i tavástara' jimi, tipua'aj mequee xu jimi tyá'tzaahuatye'? ¿Ajta ji'nye tyí'rij mej mij jimi tyá'antzaahuatye'en, tipua'aj mequee xu jáanamujari' ti a'táj jitzán ma'can tyihuó'ixaatye'en? ¿Ajta ji'nye metyá'namujran, tipua'aj quee a'táj huó'ixaatye'en i nyúucaria'ra' i Dios? ¹⁵ ¿Ajta ji'nye metyihuá'ixaatye'en i nyúucarij tipua'aj mequee huata'ítyi'huaj mej mij hua' jimi ujó'ju'? A'táj pu jin a'yan tyé'yu'si' i yu'xarij jitze tijin: “Huápu'ij mu naa huasé'rin a'fímaj i maj huata'ítyi'huaj mej mij huó'ixaatye'en i nyúucaria'ra' i tavástara'.”

¹⁶ Ajta camu néijmi'i ja'antzaahuaj i nyúucaria'ra' i Dios. A'yaa pu tyí'een ti'ij tyu'taxájtaca' a'fjna i Isaías tijin: “Tavástara', ¿a'tanyíj ja'antzaahuatye'sij i nyúucarij i tyaj tyeríj huo'té'exaa?” ¹⁷ A'yaa pu'ij tyí'een, aj pu i a'táj tyá'antzaahuatye'sij ti'ij jáanamujari' i nyúucarij, ajta a'fjna i nyúucarij a'fj pu jimi eeráma'can i nyúucaria'ra' jitze i Ciríistu'.

¹⁸ Nyajta nyáaj a'yaa nu tyí'ihuo' tijin: ¿Nyiquij mequee jáanamujari' i nyúucarij? Ji'nye mijta máanamujari'. A'yaa pu tyá'xaj i yu'xarij jitze tijin:

Néijmi'que' pu huánamujare i huá'nyuucaa,
ajta huá'nyuucaa, a'áa pu imuáj jó'namujarej jo'tij i cháanacaj
jool'ástimee.

¹⁹ Nyajtáhua'aj nu a'yan tyu'ta'íhuo'sij tijin: ¿Nyiquij mequee jáamua'reeri' a'fímaj i maj Israel jitze ajtyáma'can?, anaquéj pu i Moisés a'yan tyu'taxájtaca' tijin:

“Nyáaj nu jamuaatá'sij siaj sij tyíchueerej
a'fijma jimi i maj quee chájta'naj pué'een,
nyajta jamuaatá'sij siaj tyinyínyu'caj a'fijma
jimi i maj quee jaxie've' maj tyihuojo'itéj muá'ra'nyij.”

²⁰ Ajta i Isaías, a'yaa pu tya'huóoca'an ti a'yan tyu'taxáj tijin:

A'fímaj i maj quee nyahuoca'aj, a'fi mu náatyoj,
nyajta a'fijma jimi huatányesejrataca' i maj quee nyéetzij nye
ihuo'ca'aj.

²¹ Ajta i Isafas a'yaa pu tyihuo'taxájtaca' a'íjma i maj Israel jitze ajtyáma'can tijn: “A'náj tina'aj nu huo'tyáhuu i maj séej chájta'naj jitze ja'chej i maj quee tyu'namuaj majta quee tyihuojó'itej.”

I Israel Dios ti ja'antyíhuoj

11 ¹ A'yaa nu nyijta ijíj tyajá'mua'ihuo': ¿Nyiquij i Dios arí mahuoohuá'xij a'íjma i maj tyeétyeristyamua'me'en pué'een? Capu xaa nyu'uj. Nyáaj nu nyajta Israel jitze ajtyáma'can, nyajta i Abraham jitze eeráma'can, nyajta hua' jitze ajtyáma'can a'íjma i maj Benjamín jitze eeráma'can. ² Tí'ij na'aj jájcua imuáj, Dios pu a'yan tyihuo'taxájtaca' a'íjma i maj Israel jitze ajtyáma'can maj tyeétyeristyamua' pué'eenye'ej, ajta ijíj capu eexúj mahuoohuá'xij. ¿Nyij sequée jamua'reej je'ej ti tyé'yu'si' i yu'xarij jitze a'íj ti á'xaj i Elías, tí'ij a'yan tyaatáhuaviiri' i Dios tí'ij a'íin puéjtzij huo'tá'an a'íjma i maj Israel jitze ajtyáma'can? A'yaa pu tyu'taxájtaca' tijn: ³ “Nyavástara', mu'ríj huo'cuij a'íjma i maj muéetzij jitze ma'can tyí'xaj, majta jaatyú'uunaxij i maj japuan tyí'mu'vejritacaa, nyáaj nu'uj nyij nyasíj huatyá'itzee nyajúurij, majta mu mij nyéetzij meríj nyeje'catamui'.” ⁴ Ajta i Dios a'yaa pu tyu'tanyúj tijn: “Nu'ríj aráahua'puaj ví'ra'aj i tyeétyee ava'huoj i maj quee a'náj jaanájhaca' a'íjci i Baal.” ⁵ A'yaa mu cha'taj mana'aj cí tyí'tyesejre' ijíj i maj tyeétyeristyamua'me'en pué'een, a'íimaj i ti Dios juxié'vi'ra' jin hua'antyíhuoj. ⁶ Ajta tipua'aj i Dios hua'antyíhuoj juxié'vi'ra' jime', capu che' a'íjna jime' je'ej maj tyityetyúucha'iica'aj, jí'nye tipua'aj a'yan tyí'eenye', capu che' tyi'tíj je'ej tyí'huire' i ti jin Dios hua'antyíhuoj juxié'vi'ra' jime'.

⁷ ¿Ji'nye na'quij? A'íimaj i maj Israel jitze ajtyáma'can camu ja'ancuriáa' i maj jahuooca'aj, majta a'íimaj i Dios ti hua'antyíhuoj, a'íi mu xaa ja'ancuriáa'. Ji'nye i séecan huápu'i'ij mu quee tyihuojó'iteeca'aj, ⁸ a'yájna tí'ij tyá'xaj i yu'xarij jitze tijn: “Dios pu a'yan huó'ruuj mej mij quee tyámuamua're'ej, a'yaa mu mij móoj ijíj een, capu je'ej huá'miteeraste' i maj jaséj camu majta yó'itej i maj janamuaj.” ⁹ A'yaa pu ajta tyaataxájtaca' a'íjna i David tijn:

Miche' a'íjna jin huavívi'huaj i maj jin tyí'ye'estyaa,
mej mij jó'vatzij ajta je'en puéjtzij huo'ci'tyij.

¹⁰ Miche' aracúcu'nyij muá'ra'nyij mej mij quee che' ma'unyéjnye'rij,
Che' i hua' huaríj antyúututaj jusén jime'.

Dios pu hui'rátosij a'íjma i maj séej chuéj japua já'ma'can

¹¹ A'yaa nu nyijta ijíj tyajá'mua'ihuo' tijn: ¿Nyiquij huápu'i'ij néijmi'i jin muo'vátzij i maj Israel jitze ajtyáma'can tí'ij hua' japua rájve i puéjtzij? Capu xaa nyu'uj. Sulu mati'ij a'íimaj quee a'yan huaríj i maj Israel jitze ajtyáma'can, a'íjma pu'ij huáhuu i maj séej chuéj

japua já'ma'can mej mij júurij huatyá'itzeere'en, ajta mej mij a'fjna jin tyíchuereej i maj Israel jitze ajtyáma'can. ¹²A'yaa pu'ij tyu'tyáhuu i a'fjna i maj jin huamué'tichej a'fijmaj i maj Israel jitze ajtyáma'can, mej mij a'fjna jin huo'tyáhuu ire'en a'fijma i maj séej chuéj japua já'ma'can, jéetze' pu'ij tyámua' tye'mej a'fijma jimi a'ájna xicáara' ti'ij tyámua' huá'uuren a'fijma i maj Israel jitze ajtyáma'can.

¹³Ajta tyi'tíj nu jamuaaté'exaaty'e'ej mua'ajmaj mu siaj quee Israel jitze ajtyáma'can. Ji'nye Dios pu a'fijma jimi naata'ítyaca' i maj quee Israel jitze ajtyáma'can, a'fj nu jin jéehua jaxie've' nyaj a'fjna jin jamuaatyáhuu ire'en. ¹⁴A'yaa nu tyá'xie've' mej mij séecan i nyetye'fityeristyamua' jamua'anchueere'en mua'ajmaj, mej mij majta a'fijmaj tyá'antzaahuaty'e'en. ¹⁵Ji'nye ti'ij i Dios mahuoohuá'xij a'fijma i maj Israel jitze ajtyáma'can, a'yaa pu tyu'tyáhuu mej mij majtáhua'aj ajtyáhuu ireej i Dios jimi a'fijma i maj séej chuéj japua já'ma'can, ¿ji'nye tye'mej ti'ij i Dios ajtáhua'aj tyámua' tyihuo'tyéjeeve'j a'fijma i maj Israel jitze ajtyáma'can? A'yaa pu tye'mej ti i Dios huo'tájuuritye'sij a'fijma i maj meríj huácuil'ijca ¹⁶Ji'nye tipua'aj a'tíj jaatámu'vejritaj i Dios jimi a'fjna i páan i ti anaquéej jaatyátaahuaca', néijmi'i pu ajta i cuéjtzij huatámu'vejritiyi'huaca'. Tipua'aj i Dios jimi huatámu'vejritiyi'huaj i náana'ra' i ciyéj, néijmi'i pu i ciyáara' ajta huatámu'vejritiyi'huaj.

¹⁷A'fjna i aseitúunaj, i maj a'fijn pué'een i maj Israel jitze ajtyáma'can, a'yaa mu je'cáca tye'entyiná'xij i pi'istáara', majta je'en séej antyiví'ijtye i pi'istáa ti séej jitze ma'cantaca'aj i aseitúunaj ti jusíj ajnyéj, mua'aj xu a'fijn pué'een. A'yaa xu seríj a'fjci jitze tyitye'ejtyáma'can i aseitúunaj, i Dios ti jimi ajtyáma'can. ¹⁸Ajta caxu a'fjna jin óotzaahuaty'e'ej, siaj seríj a'fjci jitze ajtyáma'can. Tipua'aj a'yan siaríjca, xo'támua'reej ti quee mua'ajmaj jitze aróoca'nyej i náana'ra' a'fjci i ciyéj, sulu mua'aj xu a'fjci jitze aróoca'nyej i náana'ra'.

¹⁹Tyij sequée a'yan tyu'taxájtaj yee: “Séecan mu i pi'istáa antyiná'axij mej mij nyéetzij na'antivyí'ijtye'en i ciyéj jitze.” ²⁰A'yaa pu tyi'ja'yájna, ajta a'yaa mu huó'ruuj ji'nye camu tyá'tzaahuaty'a'ca'aj, siajta mua'aj a'yaa xu a'fjci jitze tyitye'ejtyáma'can a'fjci jime' siaj tyá'tzaahuaty'e'. A'fj xu jin quee óotzaahuaty'e'ej, sulu siata'aj jáatzi'nye'en i Dios. ²¹Ji'nye capu i Dios tyaatú'uunyí'ri' a'fjci i pi'istáa i ti ajtanyáxij i ciyéj jitze ti tyámua' een, capu ij ajta mua'ajmaj tyajamuaatú'uunyí'raj. ²²Siata'aj a'fjci jitze tyú'mua'tyij i ti jin i Dios jamua'ancu'vaxij, ajta ca'nyíin jin tyí'ijta. Ca'nyíin pu jin tyihuo'ta'íj a'fijma i maj ootyá'itzee, ajta mua'ajmaj jamua'ancu'vaxij. A'yaa pu'ij tyúuxie've' siaj a'fjci jitze aróoca'nyej i ti jime' i Dios tyámua' tyajamuaatá', na'ríij sequée a'yan huárinyij a'fj pu ajta majamúuhua'xij. ²³Ajta tipua'aj a'fijmaj i

maj Israel jitze ajtyáma'can majtáhua'aj tyá'antzaahuatye'en, Dios pu ajtáhua'aj hua'antiyiví'ijtye'sij, ji'nye a'fi pu jaayí'tin ti a'yan huárinyij. ²⁴Ji'nye mua'ajmaj pu i Dios jamua'antiyina'xij a'fjci jitze i ciyéj ti jusíj ajnyéj, tí'ij jamua'antiyiví'ijtye'en a'fjci jitze i séej i maj ja'tyáhuui, majta a'fijmaj i maj Israel jitze ajtyáma'can, i maj anaquéj ajtyáma'cantaca'aj a'fjci jitze i ciyéj, jéetze' pul'ij i'ríj ti i Dios ajtáhua'aj hua'antiyiví'ijtya'xi'in a'fjci jitze i ciyéj, mej mij majtáhua'aj jitzán ajtyama'cáantaj muá'ra'nyij.

Tí'ij Dios hui'rátosij a'fijma i maj Israel jitze ajtyáma'can

²⁵Nye'ihuámua', a'yaa nu tyá'xie've' sij yo'itéj xá'ra'nyij a'fjna i ti aviitzi' i Dios jimi, sij sij quee tyi'tfj jin óotzaahuatye'ej. A'fijmaj i maj Israel jitze ajtyáma'can je'cáj mu quee tyihuojó'itej, a'yaa pu tyihuo'ruuj mej mij séecan tyá'antzaahuatye'en i maj quee Israel jitze ajtyáma'can. ²⁶Tí'ij a'yan tyá'ra'nyij, néijmi'caa pu hui're'en a'fijma i maj Israel jitze ajtyáma'can, ji'nye a'yaa pu tyé'yu'si' i yu'xarij jitze tijin:

A'fjna i ti hui'rátosij a'áa pu jo'va'ma'aj ja'mej a Sión,
ajta je'en huo'tyáhuire'sij a'fijma i maj Jacob jitze eeráma'can.

²⁷A'fi pu a'fin pué'een i nyaj jin tya'tányaratziiiraj a'fijma jimi
nyati'ij tyihuo'tú'uunyí' i maj jin quee xá'pui' huarfj.

²⁸Ajta a'fjna jitze ma'can i nyúucarij i ti jin i Dios hui'rátosij,
a'fi mu jájcha'ire' i Dios i maj Israel jitze ajtyáma'can, a'yaa mu
a'fjci jin huarfj tí'ij ajta mua'ajmaj jamuáahuire'en, ajta i Dios
óoche' pu hua'xie've' a'fijma, ji'nye a'fijma pu antyíhuo i hua'
huásimua'ci'ij. ²⁹Ji'nye i ti Dios huo'ta', capu huári'raj, capu ajta
jo'rio'uunaj i nyúucarij i ti jin huo'tajé. ³⁰A'ájna imuáj xu sijta mua'aj
quee ja'rá'astijrej i Dios, ajta ijíj maj quee já'astijre' i maj Israel
jitze ajtyáma'can, Dios pu'ij arí ajta mua'ajmaj jamua'ancu'vaxij.
³¹A'yaa mu cha'taj mana'aj mij ijíj quee tyá'astijre', ta'aj ij i Dios
jamua'ancu'vaxi'in, ajta je'en hua'ancu'vajxi a'fijma a'yájna tí'ij
arí mua'ajmaj tyajamuá'ancu'vaxij. ³²Ji'nye Dios pu juxa'aj na'aj
tyihuo'xjtyej i maj jin ootyá'itzee a'fjci jimi, a'yaa pu'ij ajta juxa'aj
na'aj néijmi'caa tyá'ancu'vaxi'sij.

³³Jéehua pu huápui'ij tyu'yi'tin i Dios, néijmi'i pu tyo'mua'reej.
Capu a'tfj jaayí'tin ti jaataxáj je'ej ti a'fin tyá'xa'pui'intare', nusu ti
yo'itéj já'ra'nyij je'ej ti ajóo'en i Dios jimi. ³⁴¿A'tanyíj jamua'reej
je'ej ti een i mua'tziirira'ra' i Dios? ¿A'tanyíj jaayí'tin ti tyámua'
tyée'ixaatye'en? ³⁵¿A'tanyíj anaquéj tyi'tfj jaatá' i Dios tí'ij a'yan
tyúuxie've'ej ti jaatáuiire'en? ³⁶Ji'nye néijmi'i pu a'fjci jimi
tyajá'ma'can i Dios, a'fi pu néijmi'i tyú'taahuaca' ajta néijmi'i jimi
tyí'sejre'. Tyiche' a'náj ti na'aj tyé'tyojtzi're'ej i Dios. Che' a'yan
tyá'ra'nyij.

Je'ej maj ye'ej tyityetyúucha'ij i maj tyá'tzaahuatye'

12 ¹A'yaa nu nyij nye'ihuáamua' tyaja'muahuavij, a'íjna jime' i ti jin i Dios jamua'ancu'vaxij sij a'yan tyityaatóosejrataj tí'ij mu'vérij ti júurij, i ti ajta naa een i Dios jimi. A'yaa pu tyúuxie've' sij a'yan huárinyij sij sij júurij huatóomu'vejritaj. ²Caxu che' a'yan tyityetyúucha'íij mati'ij a'íimaj i maj a'yan séejre' i cháanacaj japua, sulu siata'aj seequéj metyityoomuámua're'ej sijta seequéj tyí'tyechajcaj siata'aj sij jáamua'reej je'ej ti i Dios tyajxié'vi'ra' i ti naa een, i ti tya'ráanajchi, ajta sij quee tyi'táj jin á'tzeeria'aj.

³A'íjci jime' i ti jin i Dios tyinaa'íjcaj juxié'vi'ra' jime', a'yaa nu tyajámua'ixaatye' néijmi'caa mua'ajmaj tiquee síij tyi'táj jin óotzaahuatye'ej. Sulu siata'aj tyámua' metyityoomuámua're'ej, sijta a'íjci jitze tyú'mua'tyij je'ej ti tyi'táj jin i Dios tyajamuaatajé siati'ij jimi tyá'antzaahuaj. ⁴Ji'nye a'yájna tí'ij i tatyévira' een, capu síij na'aj i ti jitzán tyí'sejre', capu ajta juxa'aj na'aj tyí'huiire', ⁵a'yaa tu cha'taj tyana'aj een ityáj, tyij tyajta mul'ij, séej tu'uj tyévira' pué'een i Círíistu' jimi, a'yaa tutyij séej tyana'aj tyévira' jitze néijmi'i tyitye'ejtyáma'can.

⁶Ajta i Dios quee juxa'aj na'aj tyitaatá' i tyaj jin jaatyáhuire'en, sulu a'yaa pu je'ej ti a'íj tya'ránajchaca' séej jimi ajta séej. A'íj pu jin tipua'aj i Dios a'yan tyitaatá'an tyej tyij jitzán ma'can tyu'taxáj, tyiche' jitzán ma'can tyu'taxáj a'chu tyej tyá'tzaahuatye', ⁷tipua'aj a'yan tyitaatá'an tyej tyij séecan huatyáhuire'en, tyiche' tyámua' tyihuo'tyáhuire'en. Ajta i ti a'yan tyaac'íj ti tyihuo'mua'tyej, che' tyámua' tyihuo'mua'tyej, ⁸ajta i ti a'yan tyaac'íj ti ca'nyíjra'aj huotá'an i séecan, che' ca'nyíjra'aj huotá'an. Ajta i ti a'yan tyaac'íj ti a'íjma tyu'tapu'éjve'en i maj quee je'ej tyéejviicue', che' quee ootzáahuatye'ej a'yan rijcaj, ajta i ti a'íjna jin antyúumua'reej ti tyihuo'ta'íjtye'en, che' tyámua' tyi'tyúucha'íij, ajta a'íjna i ti huá'huire' i maj japu'éjtzitarej, che' jutyamua've'ej a'yan huárinyij.

⁹Siata'aj tzáahuatyí'ra'aj jin huóoxie've'en séej sijta séej. Sijta jaatáahuataj a'íjci i ti je'ej pua'aj een, sijta je'en ja'rá'astijre'en a'íjci i ti xá'pui'. ¹⁰Siata'aj a'yan tyityahuóoxie've'en séej sijta séej tí'ij sij tyámua' naa tyityú'ihuamua'taj, sijta tzáahuatyí'ra'aj jujimí tyícha'íij.

¹¹Xaatyóoca'nyej, caxu ju'xaahuataj sij jahuíria'aj i tavástara' a'íjna jitze xa'rooca'nyéj i júuricama'ra' i Dios.

¹²Siata'aj huóotyamua've'en a'íjci jime' sij tyi'ijchó've' i Dios jimi, sijta tyo'táviicue' i sij jin jajpuéetzij, a'náj tina'aj xu jahuaviiraj i Dios. ¹³Siata'aj tyihuo'tá'an tyi'táj ti i séecan tyihuo'tziitye' i maj ja'mua jitze ajtyáma'can, sijta tyámua' naa tyihuo'tyéjeej i maj



© 1996 David C. Cook

Romanos 12:13

já'muamuaarej. ¹⁴Tyámua' xu naa tyihuo'tyéjeevej a'íjima i maj je'ej pua'aj já'mua'uurej. Caxu puéjtzij hua'tá'care'en sulu tyámua' xu'uj tyihuo'tá'an.

¹⁵Siajta huatóotyamua've'en a'íjima jamuán i maj jutyamua've', siajta huatóoxaamujritye'en a'íjima jamuán i maj juxaamuijritye'.

¹⁶Tyámua' xu huojomua'raj séej siajta séej. Caxu óotzaahuaty'e'ej, sulu siata'aj antyóosiire'en hua' jamuán i maj quee tyi'táj jin tyityetyu'uj. Caxu a'yan tyityóotzaahuaty'e'ej yee siaj nu'uj jéehua tyu'yí'tin.

¹⁷Tipua'aj a'táj je'ej pua'aj já'mua'uurej, caxu a'yan cha'taj siana'aj mua'aj je'ej pua'aj ja'uurej. A'íj xu jin tyí'tyese'ej siaj sij tyámua' tyityetyúucha'íj néijmi'caa jimi i tye'ítyee. ¹⁸Siata'aj a'yan huárinyij a'chu siaj a'yan tya'ajxié'vi'ra', siaj sij tyámua' huojomua'raj néijmi'caa i tye'ítyee. ¹⁹Nye'ihuáamua' mu nyaj já'muaxie've', caxu puéjtzij jatá'care'en i a'táj ti je'ej pua'aj jamuáaruuj, sulu che' i Dios puéjtzij jaatá'an, ji'nye a'yaa pu tyé'yu'si' i yu'xarij jitze tijin: "A'yaa pu nyéetzij tyí'nyaci'puaj nyaj puéjtzij jaatá'an a'íjci i ti je'ej pua'aj mua'uurej, nyáaj nu tyí'najchitan, a'yaa pu tyí'xaj i tavástara'." ²⁰A'yaa pu ajta tyé'yu'si' tijin: "Tipua'aj í'cuataj a'íjna i ti muájcha'íire', pata'aj tyáacue'tyej, na'ríij ajta í'mu'uj pata'aj jájtyij jaatá'an, a'yaa paj huárinyij tí'ij a'íin huatóotyevi'ra'astaj." ²¹Capáj tyi'tá'care'en ti a'íin mua'antyimué'tin i ti je'ej pua'aj een. Sulu pata'aj ja'antyimué'tin a'íjci ti je'ej pua'aj een a'íjci jime' i ti xá'puí'.

13 ¹A'yaa pu tyúuxie've' siaj néijmi'i hua'rá'astijre'en a'íjma i maj tyi'tíj jin antyúumua'reej. Ji'nye Dios pu a'yan tyihua'antyíhuoo, a'íi pu a'íjna jin tyihua'antyáarujtyej. ²A'íj pu jin a'íjna i tiquee huá'astijre' a'íjma i maj tyityatatyíj, a'íj pu quee já'astijre' je'ej ti i Dios tyu'ta'íjtaca'. Majta i maj quee tyá'astej maj a'yan huárinyij, puéjtzij pu hua' japua rávesij, ³ji'nye i maj tyityatatyíj camu a'íjna jin antyúumua'reej mej mij a'íjma muaritya'aj i maj tyámua' tyityetyúucha'íj, sulu a'íjma i maj je'ej pua'aj tyityetyúucha'íj. ¿Nyij a'yan petyá'xie've' paj quee huá'tziinye'ej a'íjma i maj tyityatatyíj? Tyámua' paj tyityá'cha'íj aj mu mij i maj tyityatatyíj jamua'reeren paj quee tyi'tíj jin á'itzeere', ⁴ji'nye a'íi pu i Dios jimi tyi'tyéjvee tí'ij muáacha'íin. Ajta tipua'aj je'ej pua'aj petyi'tyácha'íj, aj paj xaa hua'tziinye'ej puá'mej, ji'nye a'íi pu a'íjna jin antyúumua'reej tí'ij puéjtzij muaatá'an, a'íj pu jin tyi'huúire' i Dios jimi, ta'aj ij Dios jitze ma'can puéjtzij huotá'an a'íjma i maj je'ej pua'aj tyityetyúucha'íj. ⁵A'íj pu jin a'yan tyúuxie've' siaj hua'rá'astijre'en a'íjma i maj tyityatatyíj, caxu a'íj siana'aj jime' mej mij quee puéjtzij jamuaata'an, sulu siaj sij a'íjna jin ja'rá'astijre'en i Dios. ⁶A'íj xu jin mua'aj tyí'najchitaj a'íjma jimi i maj tyityatatyíj, ji'nye a'íi mu tyi'huúire' i Dios jimi, majta a'náj tina'aj a'íjna jin antyúumua'reej.

⁷Siata'aj a'yan tyihuo'tá'an séej siajta séej je'ej ti tya'ránajchi. Tipua'aj petyé'cha'íj a'íjma jimi i maj tyityatatyíj, pata'aj tyihuo'nájchitye'en, na'ríij mámuajijve'ej a'íjci jime' i paj tyi'to'raaa, pata'aj pajta a'íjci jin tyu'nájchij, pajta tzáahuatyi'ra'aj jimi tyí'cha'íj a'íjma jimi i ti a'yan tyúuxie've' paj huot'yátzaahuatye'en, pajta tyámua' tyihuo'tyéjeevej a'íjma i ti a'yan tya'ránajchi paj tyámua' tyihuo'tyéjeevej.

⁸Caxu a'tíj tyé'cha'íire'ej, a'íj xu'uj jin tyóocha'íiria'aj siaj tyámua' naa tyityahuóoxie've'en séej jamuán siajta séej, ji'nye a'íjna i ti hua'xie've' i juxa'aj tyeétyee a'íi pu arí ja'rá'astej a'íjci i nyúucarij i maj jin tyi'íjta. ⁹A'yaa pu tyá'xaj i nyúucarij i maj jin tyi'íjta tíjin: “Capáj axana'círia'aj, capáj tyi'tyacui'caj, capáj tyi'nahua'aj, capáj tyi'nyacua'tzaj”, néijmi'i i nyúucarij ti a'yan een, ajtáhua'aj i séecan, séej pu'uj jitze i nyúucarij aróo'astej i ti a'yan tyé'yu'si' tíjin: “Pata'aj a'yan tyá'xie've' i axa'aj tyévíj, ja'yájna pati'íj asíj tyá'xie've'.”

¹⁰A'íjna i ti tzáahuatyi'ra'aj jin hua'xie've' i juxa'aj tyeétyee, capu je'ej pua'aj huá'uurej i tyeétyee, a'íj pu jin néijmi'i ará'astej i nyúucarij i maj jin tyi'íjta.

¹¹Siata'aj néijmi'i tyámua' tyi'mua'reeriaj je'ej ti jíij tyí'een, siajta a'yan tyá'mua'reeriaj ti a'yan tyúuxie've' siaj atanyéjnye'rij. Ji'nye pu'ríj jéetze' véjri' a'ájna xicáara' tí'ij jitzán Dios tajapúa' huatányuusij, quee xu a'yan tyi'véjri'tacaj tyati'íj anaquéej tyá'antzaahuaj. ¹²Pu'ríj

jéetze' huatíca', a'íj pu jin arí véjri' a'ájna xicáara' ti jitzán i Ciríistu' tajapuá huatányuusij, a'íj pu jin, tyiche' tyu'tapuá'citaj a'íjci i ti je'ej pua'aj tyí'een, je'ej tyaj anaquéej rijcaa, tyiche' a'íjci jin eecátanaj i tatzárij, a'yájna ti'íj i xantáaru' tyámua' tyú'uurej ti'íj huatyéno'se'en. ¹³Tyiche' tyámua' tyityetyítacha'íij mati'íj i tyeítyee i maj nyéeri'iste' maj huaci'íj. Tyiche' quee hua' jamuán tyí'ye'estyaj i tyeítyee, tyajta quee ta'ruj, tyajta quee tyí'xana'cire'ej, nusu tyaj tanyo'si'tye'ej tajímua'aj, tyiche' quee á'tachueeria'aj. ¹⁴Sulu tyiche' tyámua' tyityahuátacha'íin a'yájna ti'íj tyi'tyúucha'íica'aj i tavástará', a'íjna i Jesús ti ajta Ciríistu' pué'een, caxu a'íjna huocaj siaj sij a'íj ará'astijre'en i ti je'ej pua'aj een i ti já'muatzajta' eerányinyii.

I maj quee jéehua uhuácaca'nye' i maj jitzán tyá'tzaahuatye'

14 ¹Siata'aj tyámua' tyeetyéjeevej a'íjci i tiquee xu jéehua tyá'tzaahuatye', caxu tyé'ihuo'raj je'ej ti a'íin tyi'táj tyojó'itej. ²A'yájna mati'íj i séecan tyí'mua'tzej ti i Dios tyi'tá'caa maj néijmi'i tyú'cua'nyij, majta séecan i maj quee tyámua' tyá'mua'reej je'ej ti tyí'een i Dios jimi, a'íj mu'uj tyí'cua'caa i ti tye'ejnyéj a chóota'. ³A'yaa pu'íj, a'íjna i ti néijmi'i tyí'cua'caa, che' quee a'yan tyá'xaahuataj a'íjci i tiquee néijmi'i tyí'cua'caa, ajta a'íjna i tiquee néijmi'i tyí'cua'caa, che' quee ajta je'ej tyá'xajta a'íjci i ti néijmi'i tyí'cua'caa, ji'nye Dios pu arí jaataxié'vej. ⁴¿A'tanyíj muáj papué'een pej pij je'ej pua'aj tyá'xajta a'íjci i ti séej jimi tyí'huiire'? Tipua'aj tyámua' huárinyij nusu quee, a'íi pu'uj jamua'reej i ti tyé'íjtye'. Ajta a'íi pu tyámua' tyu'tyá'ítzeere'ej, ji'nye tavástará' pu jaayí'tin ti'íj tyámua' jáa'uurej.

⁵Ajtáhua'aj a'yájna, séecan pu a'yan tyé'miteeraste' ti séej xicáj tyatácá'j ti jéetze' juxie've' i Dios jimi, quee máaj séecan xicáara' jitze, majta séecan a'yan tyí'mua'tzej ti juxa'aj na'aj tyi'tápuapua'reej néijmi'i i xicáj. A'yaa mu mij jujímua'aj tyámua' naa tyá'mua'reej tyi'táj maj jitzán tyá'tzaahuatye'. ⁶A'íjna i ti a'yan tyé'miteeraste' ti séej i xicáara' jitze jéetze' juxie've', a'yaa pu a'íjna jin tyeetyátzaahuatye'sij i tavástará'. Ajta a'íjna i ti néijmi'i tyí'cua'caa, a'yaa pu ajta ricij i tavástará' jimi, ajta a'íjna jin tyé'tyojtzi're' i Dios, ajta i tiquee néijmi'i tyí'cua'caa, a'yaa pu ajta a'íjna jin tyí'cua'caa i tavástará' jimi, ajta pu a'íjna jin tyé'tyojtzi're' i Dios.

⁷Néijmi'i tyati'íj tyana'aj pua'máj yan séejre' capu a'táj jusíj júurij, capu ajta a'yan tyí'mui'nyij je'ej ti jusíj tya'ajxié'vi'ra'. ⁸Tipua'aj tyajúurij, a'yaa tu tyí'tyajuurij tyej tyij tavástará' huatyáhuire'en, na'ríij táacui'nyij, a'yaa tu tyajta tyí'tyacui'nyij tavástará' jitze ma'can. A'íj pu jin tipua'aj tyajúurij nusu táacui'nyij, tavástará' tu jitze ajtyáma'can. ⁹A'íj pu jin i Ciríistu' tajitzé ma'can huamuí', ajta

je'en huatájuuriaca' tí'ij hua' vástara' pue'éenye'ej tá'ra'nyij a'íjma i maj meríj huácuij, ajta a'íjma i maj júurij.

¹⁰ ¿Ji'nye pej pij muáaj je'ej pua'aj tyá'xaj a'ihuáara'? ¿Ji'nye pej pij pajta tyá'xaahuaj? Néijmi'i tu huatátasejrataj i Dios jimi, ta'aj ij a'íin to'xíjtye'en ityájma. ¹¹ Ji'nye a'yaa pu tyá'xaj i yu'xarij jitze tíjin:

A'íjna jime' i nyaj jin júurij, a'yaa pu tyí'xaj i tavástara'
néijmi'i mu nye jimi tyítunutaxí'ij,
majta néijmi'i tyaatatyójtzi're'ej i Dios.

¹² A'íj tu jin néijmi'i a'yan tyaataxájta i Dios jimi je'ej tyaj tyi'tíj jin huaríj.

¹³ A'íj pu jin tyiche' quee tajíimua'aj je'ej pua'aj tyí'taxajtaj. Sulu tyiche' tyámua' huáta'uurej tí'ij quee síj ta'ihuáara' tyi'tíj jin ootyá'itzeere'en, nusu yó'rieenyij i ti jin tyá'tzaahuatye'. ¹⁴ Tyámua' nu nyáaj tyá'mua'reej ti quee tyi'tíj séejre' ti je'ej pua'aj tyú'uurej, nyáaj nu tyá'tzaahuatye' i Jesús jimi ti tavástara' pu'éen. Ajta tipua'aj síj a'yan tyí'mua'ajcaj ti je'ej pua'aj tyú'uurej, a'íj pu jimi quee tyámua' éenye'ej ja'mej. ¹⁵ Ajta tipua'aj a'íjna jime' je'ej paj muáaj tyi'tíj tyí'cua'caa je'ej pua'aj tyo'tóomua'tyij a'ihuáara', a'íj paj jin quee che' jaxie've' a'ihuáara'. Che' quee a'cueráj jin jo'hu'í'tzi'in ja'ihuáara', ji'nye Ciriístu' pu'ríj jitzán ma'can huamuí'. ¹⁶ Caxu sij tyi'tá'care'en ti je'ej pua'aj tyú'rinyij i ti naa tyí'een ja'mua jimi. ¹⁷ Ji'nye a'ájna jo'tíj i Dios tyejé'ijtaj, capu a'íin juxie've' je'ej tyaj tyi'tíj tyí'cua'caa nusu je'ej tyaj tyí'tyeya'caa, sulu tyej tyámua' tyí'tyechajcaj, tatatyámua've'ej a'íjna jitze ma'can i júuricama'ra' i Dios. ¹⁸ A'íjna i ti a'yan tyá'huiire' i Ciriístu', tyámua' pu tyé'tyojtzire' i Dios, majta i tye'ityee a'yaa mu tyá'mua'reeren ti a'íin tyámua' tyí'tyevij.

¹⁹ A'íj pu jin tyiche' a'yan tyityeetyátaca'nyej tyej tyij tyámua' tyi'tyítacha'íij, ajta tyej tyij tajíimua'aj huatyátahuiire'en. ²⁰ Caxu yó'jipuan i muárie'ria'ra' i Dios a'íjna jime' je'ej sij tyi'tíj tyí'cua'caa. Ji'nye néijmi'i pu i cue'ráj tyámua' tyí'een, a'íi pu'uj quee xá'pui' tipua'aj tyi'tíj puáacua'nyij ti séej jimi je'ej pua'aj een, ji'nye a'íi pu yo'riésij i ti jin tyá'tzaahuatye'. ²¹ A'íj pu jin jéetze' tyámua' sij quee hue'ra'aj cua'ajcaj, na'ríij sij nahuáj ya'caj, sijta quee tyi'tíj je'ej uuriaj tí'ij quee síj já'mua'ihuaara' tyi'tíj jin ootyá'itzeere'en. ²² A'íjna i paj jin tyá'tzaahuatye', a'yaa pu tyúuxie've' paj a'íjna jin tyámua' eenye' i Dios jimi. Che' huatóotyamua've'en a'íjna i ti quee jumua'tzírira'aj jin óoxijtye' je'ej ti tyi'tíj jin ricij. ²³ Ajta i ti quee tyámua' tyá'mua'reej ti a'yan tyí'xa'pui' ti tyi'tíj huácua'nyij, ajta je'en jáacua'nyij a'íj pu jin je'ej pua'aj tyo'tóomua'sij, ji'nye a'íi pu quee tyá'tzaahuatye' tyí'cua', ajta tyi'tíj tina'aj ti jin a'tíj a'yan rijcaj quee tyámua' tyá'tzaahuatye'ej, a'íj pu jin ootyá'itzeere'ej i Dios jimi.

Tyej tyámua' tyi'tyítacha'ij i taxa'aj tyeítjee jimi

15 ¹Tyajta i tyaj jéetze' tyámua' tyá'tzaahuatye', tyiche' tyámua' tyihuo'tyéjeevej a'íjma i maj quee xu a'chu tyá'tzaahuatye', tyajta quee a'íj tyana'aj huocaj je'ej ti ityájma tyita'ránajchij. ²A'yaa pu tyúuxie've' tyaj néijmi'i tyámua' tyihuo'tyáhuüre'en i taxa'aj tyeítjee, tyajta tyámua' tyihuo'tyáhuüre'en, tyej tyij néijmi'i tyámua' eenye'. ³Ji'nye capu i Círíistu' a'yan tyá'huocaa'aj je'ej ti a'íin tyá'xie'va'ca'aj, sulu a'yaa pu a'íj jimi tya'róo'astej je'ej ti tyé'yu'si'huaca'aj i yu'xarij jitze ti a'yan tijn: "A'íjna i maj jin je'ej pua'aj tyaja'muaxajta'aj nyéetzij pu naaci'ij." ⁴Néijmi'i i ti anaquéej ooyú'si'huaca' i yu'xarij jitze, a'yaa pu tyo'yú'si'huaca' ti'ij tyitáamua'tyej, ti'ij a'íin ca'nyíjra'aj tatá'care'en, tyej tyij tyooj tyi'ijchó've'ej i Dios jimi. ⁵Ajta i Dios i ti ca'nyíjra'aj tyu'tá'caa ti ajta tyámua' tyitaatyéjeevij, a'íi pu jamuaatyáhuüre'ej siaj sij tyámua' ja'huómua'raj séej jamuán siajta séej, a'yájna siati'ij tyaari'rej i Círíistu' jimi ti ajta Jesús pué'een, ⁶siaj sij néijmi'i tyaatatyójtzi're'en i Dios i ti vástaria'ra' pué'een i tavástara', a'íjna i Jesús ti ajta Círíistu' pué'een.

⁷Siata'aj a'yan cha'taj siana'aj tyámua' tyityahuóoxie've'en séej jamuán siajta séej, a'yájna ti'ij i Círíistu' mua'ajmaj tyajamuaataxi'é'vej, siata'aj sij tyaatatyójtzi're'en i Dios. ⁸A'yaa nu tyajá'mua'ixaatye' ti i Círíistu' a'íjna jin mujo've'mej ta'aj ij huo'tyáhuüre'en a'íjma i maj Israel jitze ajtyáma'can ajta je'en a'yan tya'róo'astej je'ej ti i Dios tyihua'táratziiri' a'íjma i maj anaquéej huaséjre, ta'aj ij a'íjna jin huataséjre'en ti Dios aróo'astee je'ej ti tyi'tj jin tya'tóorasij. ⁹A'íj pu ajta jin mujo've'mej mej mij majta a'íimaj i maj séej chuéj japua já'ma'can tyaatatyójtzi're'en i Dios a'íjci jime' ti a'íin hua'ancu'vajxi, a'yaa pu tyé'yu'si' i yu'xarij jitze tijn:

A'íj nu jin tyimuaatatyójtzi're'ej hua' tzajta' i maj séej chuéj japua já'ma'can, nyajta a jitze ma'can tyu'táchuicaj.

¹⁰Ajtáhua'aj pu a'yan tyá'xaj i yu'xarij tijn:

Siata'aj huatóotyamua've'en hua' jamuán i maj tyeítysteristyamua'me'en pué'een i Dios.

¹¹Ajtáhua'aj pu séej jitze a'yan tyá'xaj tijn:

Néijmi'i i siaj a'yan huacháatimee i cháanacaj japua, siata'aj tyaatatyójtzi're'en i tavástara'.

¹²Ajta i Isaías a'yaa pu tyo'tyéyu'xaca' tijn:

Síj pu eeránesij a'íjci jitze i Jesé,

a'íi pu'ij tyihuo'ta'íjtye'sij néijmi'caa i maj séej chuéj japua já'ma'can, majta a'íimaj, a'yaa mu jitzán tyi'ijchó've'sij ti'ij a'íin hui'rátóonyij.

¹³Ajta a'íjna i Dios i ti ca'nyíjra'aj tatá'caa tyej tyij jitzán tyi'ijchó've'ej, che' a'íin tyámua' tyajamuaatá'an siaj sij huatóotyamua've'en ajta jamuaatyápua'ritye'en mua'ajmaj mu siaj

jitzán tyá'tzaahuatye' i tavástara', che' a'fín ajta tyámua' jamuáa'uurej siaj sij jéetze' jitzán tyi'ijchó've'ej a'fjci jitze xa'rooca'nyéej i júuricama'ra' i Dios.

¹⁴Nye'ihuáamua', a'yaa nu tyámua' naa tyá'mua'reej siaj néijmi'i tyámua' tyityetyúucha'ij séej jamuán siajta séej, siajta jaayí'tin siaj tyámua' tyi'huó'ixaatye'en séej siajta séej, ¹⁵nyajta a'fjna jitze i yu'xarij a'yaa nu tya'huányaca'an nyaj a'yan tyajamuaatayú'se'en tyi'tj jime', siaj sij quee yó'hua'nan. A'yaa nu ricij siaj sij quee yó'hua'nan ti i Dios juxié'vi'ra' a'fjna jin tyina'antyáaruptyej, ¹⁶nyej nyij jaatyáhuire'en i Ciríistu' ti ajta Jesús pué'een, nyajta je'en nyúucaria'ra' i Dios huo'té'exaatye'en a'fijma i maj séej chuéj japua já'ma'can, mej mij majta a'fijmaj a'yan éenye'ej muá'ra'nyij ti'ij mu'vérij ti síj jaatyájtoo i Dios jimi, a'fjna jitze ma'can i júuricama'ra' i Dios.

¹⁷A'fj nu jin huatányaci'puaj nyej nyij huatányetyamua've'en a'fjci jimi i Ciríistu' ti ajta Jesús pué'een a'fjci jime' nyaj a'yan tyá'huire' i Dios, ¹⁸ji'nye canu á'nyaca'nyej nyej nyajtáhua'aj séecan tyi'tj jamuáa'ixaatye'en, sulu a'fj nu'uj je'ej ti i Ciríistu' arí tyú'ruuj nye jitze ma'can, mej mij a'fijmaj i maj séej chuéj japua já'ma'can majta ja'antzaahuatye'en i Dios. A'yaa mu a'fjna jin tyá'antzaahuaj je'ej nyaj tyihuó'ixaaj, ajta je'ej nyaj tyi'tj jin ricij, ¹⁹a'fjna jime' je'ej nyaj tyi'muarie' i maj jin je'ej tyo'taséj, ji'nye a'fj nu jitze arányaca'nyej i júuricama'ra' i Dios. A'fj nu jin néijmi'que' nyeríj huó'ixaaj i nyúucaria'ra' i Ciríistu', ti'ij na'aj a'áa maj huacháatimee a Jerusalén, 'asta nyana'aj quee a'áa ja'tanyéj a'áa ti huataca'aj a Iliríaj. ²⁰A'yaa nu nyij a'náj tina'aj tyi'tyese' nyej nyij tyihuó'ixaatye'en jo'maj quee xu a'náj yó'namuajri' i nyúucaria'ra' i Ciríistu', nyej nyij quee a'fjci jitze ootyényechenyij jo'tij arí síj tyojo'muáriej, ²¹sulu nyej nyij a'yan huárinyij je'ej ti tyé'yu'si' i yu'xarij jitze tijn:

A'fi mu jaséjran a'fjci i tiquee eexúj a'tj huo'té'exaa,
majta yo'itéej muá'ju'un a'fjci i maj quee xu a'náj jáanamuajri'.

Pablo pu jaaxá'pui'intarej ti'ij a'áa jo'mej a Roma

²²A'fj nu jin quee pu jáaruuj nyej nyij jamojo'tyéesej, tyij nyajta nyeríj mue'tj a'yan tyaaxá'pui'intarej nyaj a'áa ja'tanyéj ja'mua jimi. ²³Ajta ijíj nyaj nyeríj antyínyaci'ij i nyaj jin tyu'muáriej a'yaa ti huataca'aj, nyajta nyeríj a'chu pua'an nyinyi'ra'aj á'tyeej nyaj a'yan tyá'xie've' nyaj jamojo'vá'muaarej, ²⁴a'yaa nu tyá'xie've' nyaj a'yan huárinyij nyati'ij a'áa jó'me'en a España. Ajta nyati'ij jamuaaséeran, tyij nyajta quee a'chu á'tyeeren, a'yaa nu tye'ejchó've' siaj mua'aj naatáhuire' nyej nyij huame'en jó'nyej nyooj jó'yi'ij. ²⁵Ajta ijíj a'áa nu jo'ma'aj na'mej a Jerusalén nyej nyij huo'táhuire'en a'fijma i ta'ihuáamua' i maj a'áa ja'chej. ²⁶Ji'nye i maj Macedonia

huacháatimee, majta i maj Acaya ja'chej, a'yaa mu juxié'vi'ra' jin tyaaxá'pui'intarej maj huo'táhuüre'en a'íjma i ta'ihuáamua' i maj quee jelej tyéejviicue' i Jerusalén maj ja'chej. ²⁷Juxié'vi'ra' mu jin a'yan tyaaxá'pui'intarej, ajta a'yan hua' jitze tyuuxié'va'caj maj a'yan huárinyij, ji'nye a'íimaj i maj Israel jitze ajtyáma'can a'yaa mu tyihuo'táhuüi a'íjma i maj séej chuéj japua já'ma'can, a'íj mu jin majta a'íimaj i maj séej chuéj japua já'ma'can a'yan tyityatóoci'puaj maj huo'tyáhuüre'en a'íjma i maj Israel jitze ajtyáma'can. ²⁸A'yaa nu nyij nyati'íj huo'tatuüre'en i maj tyu'tá' i ta'ihuáamua', aj nu nyij a'áa jo'ma'aj na'mej ja'mua jimi, nyajta je'en a'áa jo'ma'aj na'mej a España. ²⁹A'yaa nu tyá'mua'reej ti a'yan tye'mej nyati'íj a'áa jó'me'en ja'mua jimi ti i tavástara' néijmi'i jin tyámua' tyitaatyátoosij capu ij tyi'tíj ta'itzíitya'aj ta'mej.

³⁰A'yaa nu jéehua tyaja'muahuavij nye'ihuáamua' a'íjna jitze ma'can i tavástara', a'íjci i Jesús ti ajta Ciríistu' pué'een, nyajta a'íjci jitze ma'can i júuricama'ra' i Dios, sij jéehua jahuaviiraj i Dios nyéetzij jime'. ³¹A'yaa xu tyá'huaviiraj i Dios ti'íj a'íin nyaj japua huatányuunyij a'íjma jimi i maj quee já'astijre' i tavástara' i maj Judea huacháatimee, sijta a'íjna jin jahuoocaj mej mij tyámua' tya'ancuriáan i maj Jerusalén já'ma'can i nyaj jin huo'táhuüre'ej, ³²a'yaa xu huárinyij nyej nyij a'áa jó'me'en ja'mua jimi tipua'aj i Dios a'yan tyi'tá'care'en, tyej tyij huátatyamua've'en, tyajta ca'nyíjra'aj huatáta'an séej tyajta séej. ³³Che' i Dios tyámua' tyajamuaatyápua'ritye'en mua'ajmaj. Che' a'yan tyá'ra'nyij.

Pablo pu hua'tyojtye' a'íjma i ti huá'muajtyej

16 ¹A'yaa nu tyajá'mua'ixaaty'e' ti i ta'ihuáara' ti íiti' a'íjna i Febe tyámua' naa tyihuáhuüre' a'íjma i maj jusi'rii a'ájna a Cencrea. ²Siata'aj tyámua' tyaataxie've'en tavástara' jitze ma'can, a'yájna ti'íj tyi'tyéevijtij i tajimí i tyaj i Dios jimi tyá'tzaahuaty'e', sijta néijmi'i jin jaatáhuüre'en i ti tyá'itziitye', ji'nye a'íi pu arí mui'caa huatyáhuüi i tye'ityee, ajta pu nyéetzij naatáhuüi.

³Siata'aj jaatatyójtje'en a'íjci i Priscila, sijta a'íjci i Aquila, a'íi mu nyaj jamuán tyí'muarie' tyej tyij néijmi'i jaatyáhuüre'en i Ciríistu' ti ajta Jesús pué'een. ⁴A'íi mu jéehua huápu'íj naatáhuüi, majta a'íj jin tin huácuij, nyajta quee nyáaj nyana'aj hua'tyojtye', sulu majta mu a'íimaj i maj séej chuéj japua já'ma'can i maj majta tyá'tzaahuaty'e'. ⁵Siata'aj sijta huo'tatyójtje'en a'íjma i maj a'áa jóosi'rii jo'maj ja'chej i Priscila, ajta a'íjna i Aquila. Siata'aj sijta jaatatyójtje'en a'íjci i Epéneto, i ti a'áa ja'chej a Asia i ti anaquéj tyá'antzaahuaj i Ciríistu' jimi. ⁶Sijta a'íj huatatyójtje'en i María, i ti arí jéehua tyu'muáriej ja'mua jimi. ⁷Siata'aj huo'tatyójtje'en i Andrónico, sijta i Junias, a'íi mu nyaj jamuán huanámi'huaca', majta tyámua' naa tyihuá'muajtyej

a'íimaj i maj tamuáamuata' japuan hua'puaj ará'asej, ji'nye a'íi mu anaqueéj tyá'antzaahuaj i Ciriístu' jimi nyequee nyáaj.

⁸ Siata'aj jaatatyójtje'en a'íjci i Ampliato, i nyaj jéehua jaxie've' i tavástará' jimi. ⁹ A'yaa xu siajta tyaatatyójtje'en a'íjci i Urbano i ti tajamuán tyí'muarie' i Ciriístu' jimi, siajta a'íjci i Estaquis, i nyaj nyajta jéehua jaxie've'. ¹⁰ Siata'aj jaatatyójtje'en i Apeles, a'íi pu jéehua á'viicue're' i Ciriístu' jitze ma'can, siajta a'íjima i maj Aristóbulo jamuán ja'chej. ¹¹ Siata'aj jaatatyójtje'en i nye'ihuáara' Herodión, siajta i maj Narciso jamuán aja'chej i maj tyá'tzaahuatye' i tavástará' jimi. ¹² Siata'aj jaatatyójtje'en a'íjci i Trifena, siajta a'íjci i Trifosa, i maj tavástará' jitze ma'can tyí'muarie', siajta a'íjci i Pérside, i jéehua huápu'i'ij arí tyu'muáriej i tavástará' jimi. ¹³ Siata'aj jaatatyójtje'en a'íjci i Rufo, tavástará' ti ja'antyíhuoj, siajta i náanajra', ji'nye a'íi pu a'yan tyináacha'ij ti'ij nyaj yójra' pu'éeenye'. ¹⁴ Siata'aj jaatatyójtje'en i Asíncrito, siajta i Flegonte, siajta i Hermas, siajta a'íjci i Patrobas, siajta i Hermes, siajta a'íjima i ta'ihuáamua' i maj jamuán aja'chej. ¹⁵ Siata'aj siajta a'íj huatatyójtje'en i Filólogo, siajta i Julia, siajta i Nereo, siajta i ihuáaria'ra' ti íiti', siajta i Olimpás, siajta néijmi'caa a'íjima i maj hua' jamuán a'áa ja'chej i maj majta tyá'tzaahuatye'.

¹⁶ Siata'aj huatóotyójtje'en séej jamuán siajta séej je'ej ti tyi'tyéevijtij i Dios jimi. Néijmi'i i maj jusi'rii i Dios jimi, a'íi mu yajá'muatyojtje'.

¹⁷ Nye'ihuáamua', a'yaa nu tyajá'mua'ixaatye' tzaáhuatyira'aj jime', siaj tyámua' tyihuo'séj a'íjima i maj quee xá'pu'i' ricij i maj majta meríj ajtacíj a'íjci jitze je'ej tyaj tyajamuáamuá'tyej. Siajta ajtáciiney a'íjima jimi, ¹⁸ ji'nye camu a'íimaj jahui're' i tavástará' ti ajta Ciriístu' pu'éeen, sulu a'yaa mu'uj je'ej maj jujíimua'aj tyá'xie've', a'yaa mu mij tyihuá'cuanamuaj nyúucarij jime' ti naa namuajre' a'íjima i tyeétyee i maj quee tyi'tíj jin á'itzeere'. ¹⁹ Néijmi'i mu a'yan tyá'mua'reej siaj tyámua' tyá'tzaahuatye' i tavástará' jimi. A'íj nu jin nyetyamua've' ja'mua jime', nyajta a'yan tyá'xie've' siaj sij tyámua' tyityetyúucha'ij je'ej ti tyi'tyéevijtij i Dios jimi, caxu siaj sij je'ej pua'aj rijcaj, ²⁰ a'yaa pu'ij i Dios i ti tyámua' tyitaatyápuar'ij jiyet'zín tye'entyipua'aritye'sij a'íjci i tyiyáaru' ti'ij jamuáata'an siaj néijmi'i jin tyu'tyámue'tin. Che' i tavástará' a'íjna i Jesús tyámua' tyajamuáatyátoonyij.

²¹ A'íi pu yajá'muatyojtje' i Timoteo, i ti nyaj jamuán tyí'muarie', ajta a'íjna i Lucio, ajta i Jasón, ajta i Sosípater i maj nyaj jamuán yahuatyíj.

²² Nyajta nyáaj, Tercio nyaj pu'éeen, i nyaj á'yuxaj a'íjci i yu'xarij i Pablo jitze ma'can, nyáaj nu nyajta já'muatyojtje' i tavástará' jitze ma'can.

²³ A'íi pu ajta yajá'muatyojtje' i Gayo. I nyaj jimi yahuácáaj, a'íi pu tyámua' tyihuá'cha'ij néijmi'caa i maj a'yaa jusi'rii. ²⁴ Yapu ajta

já'muatyoytje' a'íjna i Erasto i ti a'íjna jin tyi'tyéjvee ti túmii siire'ej, ajta a'íjna i ta'ihuáara' Cuarto.

I ti jin ja'antypuá'rij

²⁵Tyiche' tyaatatyójtzi're'en i Dios, i ti jaayí'tin ti ca'nyíjra'aj jamuaata'an siaj sij tyámua' tyityetyúucha'iij a'yájna nyati'ij nyeríj tyajamuáa'ixaa a'íjci i nyúucaria'ra' i Jesús ti ajta Ciríistu' pué'een. A'íjna i nyúucarij, a'íi pu a'íin pué'een i ti Dios jin arí tyitaataséjra i ti aviitzi'huaca'aj jájcuaj imuáj ti'ij quee xu séeria'caj i cháanacaj, ²⁶ajta ijíj i Dios arí taataséjratyej a'íjna jitze je'ej maj tyo'yú'xaca' i maj jitzán ma'can tyí'xaxa'ta'aj, je'ej ti i Dios i ti jusén jime' séejre' tyu'ta'íjtaca'. A'íjna i ti aviitzi'huaca'aj, pu'ríj huataséjre néijmi'que' i cháanacaj japua, mej mij jitzán tyá'antzaahuatye'en majta ja'rá'astijre'en.

²⁷Tyiche' jusén jime' tyé'tyoytzi're'ej i Dios i ti néijmi'i jin antyúumua'reej, tyiche' i Jesús ti ajta Ciríistu' pué'een jitze ma'can tyaatatyójtzi're'en. Che' a'yan tyá'ra'nyij.